


DITÈÈKIIBWA ¹

 . . . cyënza ne ndyũmvwèku bilenga bwa kuumvwa cyôci aci, abi mbîmpè. Ee, bitu misangu yônsò, anu mûngãmbi kumpala amu ne: “Mvwa ne disanka pãngambidìbu ne: “Tùye mu nzubu wa Mukalenge.” Ngeela meeji ne n’Davidi wákamba diyi adi musangu kampanda ne: “Tùye mu nzubu wa Mukalenge.” Mèmè ncitu mumanye mwaba mwîmpè nansha wùmwe to, kadi nwênù, kutamba mu nzubu wa Mukalenge.

² Mpindyewu, diloolo edi, tudi ne balunda kaaba aka bàdi bendè njila mujimà kuumukila ku Géorgie. Pàmwápa nebedeshe mashinyi bwa kukùpingana paanyima pàà—paanyima pàà didya diloolo edi. Nenku pashiishe netwikalè. . . Bamwe bàà kùdìbo mbafumine kule, ndi ntekemena ne nenùlaalè mûneemu. Ne bibambalu byônsò bitùdi naabi mbikàngula bwenu nwênù.

³ Ne pashiishe mu diisâtù diloolo netutungunuke, mu dilonga adi, ne pashiishe kabidi, bu Mukalenge mwa kwanyisha, mu dyalumingu dilwalwà.

⁴ Ne pashiishe Chautauqua ùdi ùbanga mu matuku a ngondo asambombo. Pa nanku nwênù bônsò bàdi ne diikisha dyenu dimana kulongolola abu, tudi bindile cikondo cilenga cya dicyonkomoka, ku Chautauqua. Kwôkò aku nkutùtù misangu yônsò tupetela cikondo cya dicyonkomoka cya dikema. Kacyi cya misumbà mipitepite bunene to, tutu mîngà misangu tufika ku . . . Kùdi mwa kusômba bantu batwè ku . . . Ndi ncinka ne tudi bafwànyîne kusômbeshamù bantu binunu dikumi, anu bipeepele nunku. Kadi, pa ciibidilu, cidimu cishààle ngeela meeji ne tuvwa babwejemu bantu biipacila ku binunu mwandamutekete, cintu bu nanku awu. Mwaba awu wùvwa mupate patapata ne bantu, kadi kùdi myaba ya diimana bùngì cyanàànà. Ne myaba ya disômba yidìbo bafwànyîne kuteeka mwônsò amu. Pa nanku tudi bindile cyôci aci ne mwoyi mujimà.

⁵ Ne ndi ne disanka dya kumona bààbùngì bàà ku bambi neetu balwè. Ncyênàku mvùluka dînà dyëndè mwaba ewu to, mpandanjila awu, Mwaneetu wa balume Humes ne Mwaneetu wa bakaji Humes, nnwênù bàdi basômbe mwab’ewu aba anyi, ne bânà, tudi ne disanka dya kwikalaku naabo, mpandanjila. Bakwabo abu, Mwaneetu Pat, Mwaneetu Daulton, ne, kaa, bùngibù, Mwaneetu Beeler. Ne ngãmònu Mwaneetu Collins anu katanci aka mene. Kabidi, kaa, s’mbifwànyîne kwikala bikole ndambu bwa kubateela bônsò. Kadi tudi ne disanka dyàbùngì dya kwikalaku neenu mu nzubu wa Mukalenge diloolo edi. Mwaneetu munene ne we mushinga mukole Neville ewu mmusômbe paanyima pàànyì apa bwa kusambilaku naanyì patùkaadi tulongesha Diyì. Charlie, ndi ne disanka dya

kukumona wêwè ne Mwaneetu wa bakaji Nellie kaaba aka diloolo edi, ne bânà bakese abu. Eci cidì . . . ne dilongesha dya Bible pa ciibidilu ditu menemene . . . Eyowa, Mwaneetu Welch, ndi anu . . . mvwa nkukeba's, nyawu nkumona musòmbe lwà paanyima apu mpindyewu.

⁶ Dilongesha dya Bible pa ciibidilu ditu dya njuwu ndambu, ndambu, nudi bamanye's, ncyenze bu kupatuka wenda wendela pa dibwe dya mashika dipeepele, mutùtu tucibiikila. Kadi tudi anu pàmwápa tudyumvwa ne, pa kaaba aka ne mu cikondo eci, mbifwànyine kwikalaku bîmpè bwa kufikishakù e—ekeleeziya ku cindì mèmè ngeelela meeji, ku—ku dyumvwa mu kaabujima, bilondèshile myaba, dya citùdì twikalangana mu Kilisto Yesu. Ne misangu mikwabo ntu ndyambidila ne kuyiisha ncintu cilenga cya dikema, kadi ndi misangu mikwabo, Mwaneetu Beeler, ngeela meeji ne, kulongesha nkupite aci kule ne kule, kwòkò kùdi . . . nangananga bwa ekeleeziya.

Mpindyewu, pa ciibidilu kuyiisha kwòkò kùdi kùbàkula ngènzàmpèkààtù, kùmufikisha ku didyumvwa mupiiile ku Dìyi. Kadi kulongesha kùdi kùshikika muntu bilondèshile cidìye pa kaaba. Nenku katwenaku bakumbane menemene mwa kwikalala ne diitabuuja patùdì katùyi bamanye citùdì bilondèshile myaba to.

⁷ Mpindyewu, États-Unis, buloba bulenga ebu, bu yèyè mwa kuntuma mu Russie mwàmwa, bu mùlòpò wà ditunga edi, mu Russie, dîbà adi bu ne bôbò mbantume mu Russie bya bimanya kùdì bônso, bukole bwônso bùtù naabu États-Unis abu bùdì bùmfilà. Dìyi dyànyì mèmè didi menemene anu dya mwomumwe ne dya États-Unis, piikalàbi ne ndi mumanyiibwe bu mùlòpò.

⁸ Nenku piikalàbi ne Nzambi mmututume twètù aba bwa kwikalala milòpò Yèndè, bukole bwônso bùdì mu Dyulu abu, cyônso cidì Nzambi wikalangana aci, Banjelo Bèndè bônso ne bukole Bwèndè bwônso mbiimane paanyima pàà mèyi etu twètù piikalàbi ne tudi baamisanjeela bajaadika mu mudimu mu mushindu mujaalame, batùmiiibwe kùdì cisàmbà. Bùdì Nzambi naabu mbwà kutwa Dìyi mushinga, bwalu Yèyè mmufùnde mushindu awu kakùyi tuseku to, ne: “Cyônso cyùdì uswika pa buloba, Mèmè nènciswikè mu Dyulu. Cyônso cyùdì usuulula pa buloba, Mèmè nèncisùlulùlè mu Dyulu. Ne Mèmè ndi nkupesha nsapi ya Bukalenge.” Kaa, milayi minene ya mushindu awu yidiYe mupèeshe ekeleeziya!

⁹ Ne mèmè ndi, paanyima pàà dituku adi . . . Bààbùngì bàà kunùdì, ngeela meeji ne, bàvwa kaaba aka mu dinda emu bwa kuumvwa pàmvwà nteeta, mu mushindu wànyì wà didipwekesha, mupwekele awu, bwa kuumvwija ci—cikeena-kumona cya Dyulu cîmvwà mumone.

¹⁰ Ncyènàku mèmè mufwànyine nansha bya munyì kuteeta kwela cintu nansha cimwe mpatà cidì muntu nansha yèyè

nganyì mungambile ne Nzambi mmumwambile to. Ndi mufwànyine kuciitabuuja nansha nciyi mucimone mu Mifundu, ndi mufwànyine anu kuswa bwa kwitabuuja dîyi dya mwaneetu awu. Ndi—ndi mufwànyine anu kushààla pamwe ne Bible, kadi mufwànyine anu kutungunuka ne kwitabuuja ne pàmwâpa mwaneetu awu mmucyũmvwè bibi mu mushindu kampanda, ne yêyè mmufwànyine kwikala mucibwejakaje ndambu. Ne nansha nanku ndi mufwànyine anu kwitabuuja ne yêyè—yêyè ùdi anu mwaneetu.

11 Ne kwókò kwikàle cintu cilàkuka kapyà munda mwa mwoyi wànyì, ne ndi ne ditekemena dya ne kacyakungumukaku mu bidimu byànyì bìlwalwà to, mu mushindu wa ne ncyakupwaku mwoyi to cidì cyenzèke mu dinda dya dyalumingu dyàshààdi edi, kwénjì lumingu. Ncingenze cintu kampanda cidì cishintùlùle nsòmbelu wanyì bikole bya menemene. Ncyèna—ncyèna ne bwòwà to. Ncyènàku—ncyènàku ne bwòwà bwa lufu nansha bukesa to. Lufu kalwena ne bwòwà bùdilu lùfila to nansha bukesa. Ne lwòlò—lwòlò kalwèna naabu bwebe wèwè to bu wèwè anu muumvwe. Mpindyewu, pàmwâpa byòbì ne . . . Bìvwa bifwànyine kukèngela bwa wèwè kwikalakù mwenze dilabula adi bwa wèwè kucimanya, bwalu kakwèna mushindu wa kucyũmvwija to nansha mukese. Kwèna mwa kupeta myaku to, bwalu kayèèna yisanganyibwa mu nkonga-myaku wa Anglais to, nansha mene mu mukwabo nkonga-myaku nansha umwe, bwalu mmu Cyendèlèlè; makeelela kàyimù, màalabà kàyimù, byònsò bìdi anu dîbà dya mpindyewu. Ne kakwena bya ne “Ndi muumvweku bilenga,” ne dya kupita dîbà dimwe nunku ne: “Ncyèna ndyumvwa bìmpè menemene to,” ne dikwabo dîbà ne, “ngũmvù cyakabidi bìmpè” to. Bidi anu dîbà dya mpindyewu dîbà dyònsò. Nwamonu anyi? Kabiyikù bìjika to, anu ditalala dya butumbi adi, cintu kampanda.

12 Ne kamwenaku mwa kwikala mpekaatu nansha umwe to, kî mmufwànyine kwikala mukawu to, kî mmufwànyine kwikala bubeedi to, kî—kî mmufwànyine kwikala cintu nansha cimwe cya cìkafìkakù ku mwelelu kwa Dyulu kwàka to. Ne bu mèmè mwa kwikalakù ne dyèsè dya kwamba cyòcì eci, bwalu, pàmwâpa ncyèna naadi to. Mèmè nciyi naadi to, dîbà adi ndi ndòmbà Nzambi bwa amfwilèku luse. Kadi mèmè ne dyèsè adi, ne byòbì biikàle ne cìvwa n’Nzambi mungiitabile bwa kwambwibwa bwa kumona cintu kampanda, ndi mufwànyine kwamba ne n’Dyulu dya kumpala. Nenu dîbà adi ndi ngeela meeki ne, kampanda mu Bible, dìnà dyèndè, ngeela meeki ùvwa m’Pòlò, wákambwibwa mu Dyulu diisâtù awu. Kadi piikalàbi ne nyawu bìvwa bya butumbi mushindu awu mu Dyulu dya kumpala, Dyulu diisâtù adi ndilamè cinyi? Kabyena bikèmesha to mwàkapangàye mwa kubyamba munda mwa bidimu dikumi ne binaayi! Kwambaye ne kàvwa mumanye ní ùvwa mu mubidi anyi pambelu pàà mubidi. Bwa mupostolo munene awu, kî mbwà kwabanyangana nende mudimu wèndè—wèndè—wèndè awu,

anyì kî mbwà kuteeta kudivwija twètù biine cintu kampanda cya bu mûvwàye yèyè amu nansha, kadi ndiku mwa kwamba pamwe nende ne, ncyèna mumanye ní mvwa mu mubidi ewu anyì pambelu pàà mubidi. Cintu cimwepele cidi ne, bìvwa bya cya bushuwa anu mûndì munutangile nwènù emu.

¹³ Ne ntu misangu yònsò anu ndikonka ní ndi mufwànyine kwenza mu dipita amu mèmè kumona kaadivuba kakese kènda kàlèlema, nyuma kampanda, ne kwamba ne: “Ki mwaneetu wa balume ne wa bakaji bàyaayà bàba, s’n’Charlie ne Nellie. S’m’Mwaneetu wa balume ne Mwaneetu wa bakaji Spencer bàyaayà kwàka bàba.” Cintu aci cívwa anu cìmpìcìla’s. Mésù àànyì òwò àsanganyibwa mu lukita, munkaci mwa kunyanguka, mwa kubola, maci àànyì òwò kaàciyi kabidi mwab’ewu bwa kuumvwa to, ne mashi àànyì wòwò maalukile ònsò ne beelemu bwanga bwa dibenga kubola, ne àsanganyibwa mu mâyi anyì mu buloba, ne byeledi byànyì bya meeji, tubulu twànyì twa bwongò twòtò tumane kufwa, dîbà adi mmunyi mûndiku mufwànyine kwikala cîngà cintu kacìyi anu nyuma wa wènda ùlèlema wàtwa eku wàtwa eku? Nenku cyòci aci cívwa cìntàcisha mu meeji. Mushindu mwine wùntù muswe kwambaku ne: “Wetwawu, Mwaneetu Pat, kaa, ndi ne disanka be bwa kukumona! Wetwawu, Mwaneetu Neville, mushindu mwine wùndì muswe kukumona’s!” Kadi mvwa ndyambidila ne: “Ee, mèmè nciyi ne cintu cya kumona naaci to, nciyi ne mukana mwa kwakula naamu, bimanè kubola, bishààle lupwishi, mmunyi mûngààpetà mushindu wà kwamba ne: ‘Wetwawu, Mwaneetu Pat,’ ‘Wetwawu, Mwaneetu Neville,’ anyì bikwabo, ‘Wetwawu, Charlie?’”

¹⁴ Kadi mpindyewu ndi mumanye ne abi kabyèna nanku to. Bwalu mbifundiibwe mu Mifundu, bìndi ngamba ne kî mbibengangane to ne: “Bwalu ntenta wa pa buloba ewu yèyè munyanguke, tukàadi ne mukwabo mwindìle,” mukwabo ntenta udi ne mèsù, ne maci, ne mishiku, ne byeledi bya meeji. “Ntenta wa pa buloba ewu yèyè munyanguke!” Ùdi ne mubidi wùndì mwa kulenga, wùndì mwa kwakwilamu.

¹⁵ Nenku mpindyewu nyewu bîmvwila, anu mpindyewu mene ne, Mòsà ùkaavwa mufwe ne ùsanganyibwa mu lukita lùvwàbo kabàyi bateèkepù cimanyinu to kùkaavwa bidimu kî mbîngì kî mbîngì nkama mwandamukulu, ne Elisha ùkaavwa muye mu Dyulu kùkaavwa bidimu nkama yitaanu kumpala, kadi pa Mukuna wa Dikudimuka dya mpala bòbò’s bàakabàpetà bàyiikilangana ne Yesu.

¹⁶ Paanyima pàà Samwèlè mumane kufwa kùkaavwa bidimu byòbì bikese mbisatu anyì bitaanu, kadi mwamùlopò wa mu Ènè-Dò wakamujuula, ne mukaji awu wàkapòna mutwe mpala panshi, ne wàkamba ne: “Wèwè’s wandingì, bwalu wèwè udi Shawùlà, wèwè mwine awu.” Kwambaye ne: “Bwalu ndi mmona

banzambi!” Mukaji awu ùvwa mumpàngaanù, nudi numona’s. “Ndi mmona banzambi bàjuuka.”

17 Kadi Shawùlà kàvwa mwa kwanji kumumona to, ki yêyè kwamba ne: “Yêyè awu ùdi ne mmwenekelu kaayi? Anji ngumvwijèbi tǔng mùdiye.”

Kwambaye ne: “Ngwa kanyikanyì, ne ùdi ne cikòwelu pa dikaaya.”

18 Yêyè ne: “N’Samwèlè awu, muprofeta, mufikìshèbi mwaba ewu kumpala kwànyì.” Nenku ndi muswe bwa nwènù kumona ne Samwèlè kàvwa mujimijeku kantu nansha kamwe kàà buumùntù bwèndè to. Yêyè ùcìvwa anu muprofeta. Wàkambila Shawùlà anu menemene cìvwa mwa kwenzeka dituku dìvwa dilonà.

19 Pa nanku, nudi numona’s, lufu kalwena lùtùumusha byònsò bitùdi patùdi tudila myadi ne tutwa mikemu ne tudilakana ku lukita apu to. Lùdi lùshintulula anu mwaba wètù wa cisòmbedi cyanààna. Lùdi lùtùumusha mu mwaba kampanda lùya neetu ku . . . Búngì bwa bidimu ncinyì? Mèmè mushààle ne mwoyi dîbà dimwepele, s’nèngìikalè ne mwoyi kutàmba bantu bààbúngì bàà bidimu dikumi ne bisambombo, nèngìikalè ne mwoyi kutàmba bantu bààbúngì bàà bidimu bitaanu. Búngì bwa bidimu kí ncintu to. Tudi bateekiibwe panwapa anu bwa kiipacila kampanda, bwa kwenza cintu kampanda.

20 Ee, mpindyewu, bààbúngì bàà ku baamaamù bakese bàà kwísù kulenga bàdi basòmbe kaaba aka aba, bamwe bàà ku bàdi ne bidimu makumi asambombo anyì ne bidimu makumi mwandamutekete, mbafwànyìne kwamba ne: “Ee, kadi cínkaadìku mèmè ewu mwenze ncinyì’s, Mwaneetu Branham?” Nwènù nukàadi bakoleshe bânà beenu balela. Nukàadi benzè cinùvwa ne cya kwenza.

21 Pàmwàpa papa kampanda mukulakaji musòmbe kaaba aka, wàmba ne: “Ee, mèmè’s ndi musekùnèsèkùne mu madimi, s’nkàadi mwenze *cikampanda*. Kacya ncìtu mwanjì kuyiishaku to.” Kadi wèwè’s udi mwenze anu cìvwa Nzambi mukutumine bwa wèwè kwenza aci. Kùdi mwaba bwebe wèwè.

22 Pàmvwà nyiikilangana ne ngangabuka mukole kampanda, makeelela awu, umwe wa ku balunda bàànyì bangangabuka, baanyaàanaanyì, wa bidimu makumi mwandamukulu ne bya mu njila. Ne bukondè bwèndè wa bakaji ùdi kaaba aka, mu ekeleziya emu diloolo edi, ne yêyè mmutacishiibwe anu mu meeji kakese ndambu bwa bwalu bwèndè. Ki mèmè kuya kamumona. Kadi ndi mwenze anu mbanga kuyiikilangana nende anyì, kwísù kwèndè kumbà kusànguluka, ki kundondelaye bwa lwendu kampanda lwà dilemba dya nyama lùvwaye mwenze mu Colorado kùkaavwa bidimu byàbúngì, ditunga anu dyòdi dimwedimwe mùntù nya kalemba nyama amu. Meeji macikàle

anu matwe a njàjàmà! Ki mêmè kwamba ne: “Ngangabuka, ùdi ùkwàta mudimu ewu kùkaadi ntanta bule kaayi?”

²³ Yèyè ne: “Paùcìvwà wèwè wamwa dibeele apu.” Ki munda mwànyì menemene mwàmwa mêmè kwamba... “Misangu mivule,” mwàkambàye, “mwawa ncyenza, ngangata ditempu dyànyì, nteeka bibuta byànyì bya ku cisòmbedi pa kabalu kàànyì apu. Mwawa ngangata cibuta cyànyì cikese cya dyela bintu aci ne ntu nkààdikù muye lwà makàsà.”

²⁴ Ki mêmè ne: “Eyowa, wenda upwekela ku mwelelu wa kasulu, pa dîbà ibidi wa bufuku, ne mwêndù wèbè wà toolòshì mwab’awu, ukeba bwa kupeta nzubu uvwa mwànà mukese kampanda mwikàle ne munda mumusaama anyì maamù mwikàle ne bisaamà bya pa kulela.”

“Aci ncyà bushuwa.”

²⁵ Ki mêmè ne: “Udi mumanye’s, ngangabuka, mêmè ndi ngiitabuuja ne, dyàmwàmwa dya mushoonyi ewu, wùdi wùtápululà cifwaka ne dibenga-kufwa ewu, Nzambi ùdi ne kaaba bwa bangangabuka bakulakaji bîmpè bàtù bakwàte mudimu mushindu awu.”

²⁶ Binsonji binène kadi kumutengebelabi mu mèsù ne kukutulaye mwadi, kujuula byanza byèndè bitekètè abi e kwambaye ne: “Mwaneetu wanyì, s’ki cîndì ntekemena’s.” Dyàmwàmwa dya buloba abu, Nzambi ùdi ùlumbulwisha musuuka wà muntu, cìdìye aci.

²⁷ Ki pashiishe mêmè kumupeesha Mufundu wùdi wùsànkisha ewu. Misangu mivule, mu kwenda kupenga njila wènda ùpicila mu madimi a bitoci awu ne midimà bufuku, ùkèba bwa kwambulwishaku muntu kampanda, pàmwàpa kùyì upetaku nansha kaadyeyà bwa ciine aci to, kadi kakwèna bwalu to. Mêmè kwamba ne: “Yesu mmwambe mu Mufundu ne: ‘Bàà dyakalenga ng’aba bàdì ne luse, bwalu nebapete luse.’” Ne ncyà bushuwa cyòci aci.

²⁸ Nenku diloolo edi tudi kushikika ekeleeziya, mu maleesona asatu aa, bu Nzambi mwa kwanyisha, munyì ne cinyì cya kutangila, citùdi aci. Netwìkalè mwa kubangila ku nshapita wa kumpala wa Mukanda wà mukanda wà Pòlò mufundila beena Efeso. Ne netwìkalè mwa kwangata nshapita yisatu ya kumpala mu malonga etu asatu ikalà mwa kulonda awu, biikàle tuteeta bwa kwangata nshapita umwe ku diloolo dyònsò, twètù ne mushindu. Diloolo edi, mu diisâtù, ne mu dyalumingu dilwalwà. Efeso, nshapita wà kumpala. Mpindyewu patùdi tulonga pamwe apa, ndi njinga kwamba nunku ne, Mukanda wà Efeso ewu wùdi wùpàlakana anu menemene ne wà Yoshùwà mu Dipungila Dikulukulu. Efeso, Mukanda wà Efeso.

²⁹ Mpindyewu, nwavulukaayi ne, byòbì byenzèke ne twìkalè bapampàlámùke anu kakese cyanàànà, ku wenù ndongèshìlù, watùfwilakù anu luse kadi ututwaleku bwa katanci.

Kumpala kwa twètù kubuululapu, twánjàayi kuMulomba bwa àtùkwàcishèku, patùdi twinyika mitu yetu apa.

³⁰ Mukalenge, nyewu tuseemena pabwìpì ne Mifundu Yebe ya cijila ne minsantu, bwalu Yòyi nyidi ne dikubiibwa kutamba maulu ònsò ne buloba. Bwalu, tudì tubala nunku mu Dìyi didì dibiikidiibwà ne m'Bible edi, ne: “Dyulu ne buloba byònsò bibidi nebijimine, kadi Dìyi Dyànyi kadyadyakupangilaku to.” Nenku, pa dībā dya kadiyi dya tuseku edi dīndi ndwa ku cyambilu eci diloolo edi, kumpala kwa cintu cisumba ku Mashì Ebe, bantu bàà cifwaka bananga bàà mushinga mukole bàdi basòmbe kaaba aka diloolo edi aba, munkaci mwa kukwata kaaditekemena kakese kònsò kàdìbo mwa kukwata, bwa kushàala anu kacya bààkwata bindile Bukènkè bwàlwà abu. Swaku bwa kwikalabi bikùmbàne menemene, diloolo edi, bwa mwena kwitabuujà yònsò udi kaaba aka amone kaaba kèndè, ne muntu yònsò utu kayikù mwanjì kubwela mu bwobumwe bunene ebu, àlwanganè mvita bwa Bukalenge, Mukalenge, ne àkookolè ku ciibi too ne pààkangulà Mulami wa ciibi. Enzaku nanku, Mukalenge.

³¹ Tudì tubala mwómò emu mùdibi ne Bible kí ngwa didyumvwijila dya muntu pàà nkàayendè to. Nzambi, kwitabikù to bwa mèmè musadidi Webè anyi nansha musadidi mukwabo kanà yònsò mufwànyine kuteeta kwela didyumvwijila dyèndè yèyè mwine ku Dìyi. Itabaku bwa twètù kuDibala ne kuDitabuujà anu cyanàànà, mushindu wùdiDi difùndiibwe awu. Ne nangananga twètù balami bàà bisumbu bya mikooko, twètù bampaasata bààsangilà dīngà dituku mu Buloba bwa butumbi mwàmwa ne tusumbu tukese twa mikooko atu, ne netwimanè mu Bwikadi bwa Mukalenge Yesu ne netumone lukòngo alu lùpàtuka, lwà Pòlò, ne lwà Peetèlò, ne lwà Luuka, ne Maako, ne Maataayi, ne bònsò abu, ne netubamone balumbulwishiibwamu pamwe ne bisumbu byabo. Nzambi, enzaku bwa ngàpetakù mushindu wa kuteeka bivulukilu binunu dikumi ku makàsà Kwebe pàngìikalà ngenda nkalaba mu didipwekesha dyònsò too ne pàngààlwà kuteeka byanza byànyi pa makàsà Ebe a mushinga mukole awu apu, ne kwamba ne: “Mukalenge, mBeebe Wèwè.”

³² Éyi Nzambi, tujèku cyakabidi ne Nyuma Webè, ne dinanga Dyebe ne bwìmpè Bwebe. Ne swaku bwa twètù, bu mùdi mwedi wa kasala mucyàmbè mu musambu kùkaadi bidimu byàbùngì ne: “Wèwè Mwànà wa mukooko munanga udi upùnga ne lufu, Mashì Ebe a mushinga mukole awu kaadyàkujimijakù bukole bwawu to, too ne piikalà Ekeleeziya mujimà mupikula wa Nzambi mwa kwikala musungidiibwe bwa kàyikù mwa kwenza kabidi mpekaatu to. Ne kacya anu, ku diitabuujà, ngaamona musulu awu wùdi mputa Webè udi uzòloloka awu mupetèshe; dinanga dipikudi ndikaadi cyena-bwalu cyànyi, ne nedishaale nanku too ne pàngààfwà. Dībā adi mu musambu mutàmbe bulenga, mutàmbe kwikala wà kalolo,” mùdiye mutungùnùke ne

kwamba, “nêngimbè bukole Bwebe bwa disungila; ludimi lùdi lwàkulà ne kalubilubi ne lùkukumina elu, pààlààlalu cimùmà mu lukita.” Dìbà adi, lukita kalwakulamaku lufu nansha lwà bishi bwa bânà Beebe to. Lùdi anu nciikishilu cyanàànà, anyi cisokomenu, mwàvwàdilà dibola edi dibènga-kubola.

³³ Swaku bwa diloolo edi tumoneku cyôci eci, Mukalenge, bitòòke tòò, pàdibi bitùpèeshiibwa mu Dìyì apa. Tùpèeshèku dyumvwa. Ne tùshikikèku, Mukalenge, pa kaaba keetu kàà mudimu, bwa twamonaku mwa kukwata mudimu ne lulamatu lwònsò too ne paWàlwà. Tudi tulomba nunku mu Dìnà dya Yesu, ne bwa bwalu Bwèndè. Amen.

³⁴ Mpindyewu, Mukanda wa Efeso, bu mûngăfûmu ku dyamba, mêmè. . . bwa ku dyànyì dimona, ngùmwe wà ku Mikanda ya mitambe bunene ya Dipungila Dipyadipya. Wùdi wùtùshiya, mwaba wùdi Calvinisme ùlalukila ùya ku ditamba kampanda, ne Arminisme ùlalukila ùya ku dikwabo ditamba awu, kadi Mukanda wa Efeso wùdi wùbikòka wùbitwàngaja kaaba kamwe ne wùshikika Ekeleeziya bilondeshile mwaba.

³⁵ Mpindyewu, ndi muwufwanyikije ne Yoshùwà. Bu nwênù mwa kwikala bamone, Izaleela wàkapàtudiibwa mu Ejiipitu, ne kùdi bitùpà bisatu bya lwendu lwabo. Citùpà cimwe, cìvwa ndipatuka dya mu Ejiipitu. Citùpà cìdi cìlondà, cìvwa ncipeela. Ne citùpà cìdi cìlondà, cìvwa n’Kaanàànà.

³⁶ Mpindyewu, Kaanàànà kèna ùleeja cikondo cya Bukalenge bwa bidimu cinunu to. Ùdi ùleeja anu cikondo cya mucimunyanganyi cyanàànà, cipungu cya dicimungana, bwalu mu Kaanàànà bàvwa bàshebeyangana ne bòòsha ne bàkwàta bimenga. Kadi kakwakwikala lufu mu Bukalenge bwa bidimu cinunu nansha.

³⁷ Kadi cikwabo cintu cìdiwu wènza, wùdi wùtwàla dibingishiibwa ku diitabuuja, paanyima pàà bòbò bamanè kwitabuuja Mòsà ne buumùke mu Ejiipitu. Dijidiibwa, ku dilonda dya mwinsi mwa Dikunji dya Kàpya ne difuta dya cibawu dya mwànà wa mukooko wa mulambu mu cipeela. Ne pashiishe dibwela dya mu buloba bùvwà bulayiibwe abu.

³⁸ Mpindyewu, buloba bùdi bulaya mwena kwitabuuja wa Dipungila Dipyadipya ncinyì? Mulayi n’Nyuma Mwimpè. “Bwalu nebyenzeke mu matuku a ndekeelu ne,” Yowela 2.28, “Nèmpongololè Nyuma Wanyì pa mubidi ne mubidi wònsò. Bânà beenu balela balume ne bakaji nebàmbè biprofeta. Ne pa basadidi Bäännyì balume ne basadidi Bäännyì bakaji Nèmpongololè Nyuma Wanyì, ne bòbò nebàmbè biprofeta. Nèndeje maalu a kukema mu maułu kuulu. Ne pa buloba, makunji a kàpya, ne mwìshì, ne dibungi.” Ki Peetèlò kwambaye, mu Dituku dya Mpenta amu, paanyima pàà yèyè mumane kwangata cyena-bwalu cyèndè ne muyiishe ne: “Nyingalalaayi, muntu ne muntu wa kunùdi, ne nubatijiibwe mu Dìnà dya

Yesu Kilisto bwa dilekelediibwa,” kulekeleela, kufwila luse, kuumusha matomboka ônsò a kale.

³⁹ Nukààvwakù bamòne ne, Yoshùwà, kumpala kwa bôbò kusabuka Yadènè, Yoshùwà wàkamba ne: “Picilàayi munkaci mwa cituudilu nùsukulàayi bilàmbà byenu byônsò ne nudijidile muntu ne muntu wa kunùdì, ne muntu nansha umwe kaseemenyi kùdì mukajèndè to, bwalu mu matuku asatu emu nenumone butumbi bwa Nzambi.” Nwamonu anyi? Cìdi—cìdi nnjila wa didilongolola bwa kupyana mulayi. Mpindyewu, mulayi bwa Izaleela, wùvwa ne, Nzambi ùvwa mupeeshe Abraham mulayi wà buloba, bwa Palestina, ne bùvwa ne cya kwikala cintu cyabo bwa kashidi. Ne bivwa bikèngela bwa kushààlabò misangu yônsò anu mu buloba abu.

⁴⁰ Mpindyewu, bôbò bààkenda mu bitùpà bisatu, mu kulwa kwabo batàngile ku buloba bulaya abu. Mpindyewu tàngilàayi, ncifwànyikijiibwe anu menemene mu Dipungila Dipyadipya.

⁴¹ Mpindyewu eci, anu mûngãmbì ne, cìdi cibèngangana ne yimwè ya ku ngeelèlù yenu ya meeji. Bamwe bàà kunùdì nwènù ba-Nazaréens bàà mushinga mukole, beena Église de Dieu, ne bakwabo, kanulekediku cìnùtãpa mu mwoyi to, kadi citàngilaayi ne ntema yônsò ne tàngilàayi bifwanyikijilu abi. Nùtangilàayi bwa numone kaaba ne kaaba kônsò ní kakeena kàkùmbanangana anu pyòpyòpyò.

⁴² Kùvwa bitùpà bisatu bya lwendu, ne kùdì bitùpà bisatu bya elu lwendu. Bwalu, twètù tudi tubingishiibwa ku diitabuuja, patùdì twitabuuja Mukalenge Yesu Kilisto, tushiya buloba bwa Ejiipitu, tupàtuka. Ne pashiishe tudi tujidiibwa ku mulambu wa Mashi Èndè, tusukudiibwa ku mpekaatu yetu, ne tulwa beena lwendu ne beena lupitapita, biikàle twamba ne tudi twenda tukeba buloba kampanda, cimenga cicilwalwà, anyi mulayi kampanda.

⁴³ Ki civwà pèndè Izaleela mwenze mu cipeela, beena lupitapita, kabàyi ne mwaba wa kwikishila, biikàle anu mu lwendu bufuku ne bufuku bwônsò, bènda bàlonda Dikunji dya Kapya, kadi ndekeelu wa byônsò kufikabo ku buloba bulaya mwàkasòmbelàbo.

⁴⁴ Mwômò amu ki mùdì mwena kwitabuuja ùkafika. Yèyè ùdi wànji kafika ku dijingulula ne yèyè ùdi ngènzàmpèkàatù; pashiishe ùdi ùtàpuludiibwa kùdì màyi, disukudiibwa dya ne màyi, ku Mashi, ne...anyi dyoweshiibwa dya ne màyi ku Dìyi's we, pàdiye wìtabuuja Mukalenge Yesu Kilisto. Pashiishe, mumane kubingishiibwa ku diitabuuja, ùdi ùlwa mwabanyanganyi, ne mu ditalala ne Nzambi, kupicila ku Kilisto, mubatijiibwe mu Dìna dya Yesu Kilisto, bwa kumubweja mu lwendu. Nwacyùmvù anyi? Ùbwela mu lwendu! Dìbà adi yèyè ùdi ùlwa mwena lupitapita ne mwena lwendu. Yèyè ùdi mu lwendu mutàngile ku cinyi? Ku mulayi wùdì Nzambi mufile.

45 Izaleela kàvwa mwanjì kupeta mulayi awu to, kadi bàvwa mu lwendu. Nenku kí mbwa kujuula. . . Umvwayìkù bu nwênù mwa kuswa. Ki mwaba ngwôwò awu wunùdi nwênù badìshìndìle, nwênù ba-Nazaréens ne ba-Pèlerins de la Sainteté, ne bakwabo,. Bwalu, Izaleela, pàakafikàbo pa kaaba aku, kàa Kaadèsà-Baanèa aku, pàakayà batentekedi dyàmwàmwa ne kwambabo ne: “Buloba mbunene,” kadi bamwe bàà kùdìbo bààkaalukila e kwambabo ne: “Katwenaku mwa kubukwata to, bwalu bimenga mbiibakila munkaci mwa bimanu, ne bikwabo.” Kadi Yoshùwà ne Kaalèbà bààkadìsunga, kwambabo ne: “Twètù tudi batàmbe ne bukole bwa kubukwata!” Bwa mèyi àbò àkaavwà mamana kufunda matwa cyàla awu, bàvwa bòbò biitabùùje midimu yibidi ya ngàsà ayi, dibingishiibwa ne dijidiibwa, ne kabàyìkù mwa kuya kupita apu to. Kadi, tèèlejàayi, lukòngò lujimà alu lwàkabùtukila mu cipeela. Anu babidi bàà ku bòbò abu bààkabwela mu buloba bulaya ne bààkaalukila ne cileeji cya ne bùvwa mbuloba bwîmpè, “ne twètù tuvwa batàmbe ne bukole bwa kubukwata, bwalu cìvwa mmulayi wa Nzambi.” Dìbà adi pamutu pàà bantu abu kutungunukabo, bààpeta Nyuma Mwîmpè, bààkula mu myakulu, bààpeta bukole bwa Nzambi, dibatiiza dya Nyuma Mwîmpè, bimanyinu, maalu a kukema, bishima, kuumvwabo bòbò ne cìvwa cìfwànyine kunyangakaja bilele bya dilongesha dyabo. Kadi ncinyi cyàkenzekà? Bààkabùtukila mu buloba abu! Neya bushuwa.

46 Kadi beena kwitabuuja bòbò, kasumbu kàa ba-Yoshùwà ne Kaalèbà aku, bàvwa batùngùnùke bènda bàya ku mulayi abu, bàkatùngunuka too ne mwàkabwelàbo mu buloba abu, ne kukwatabo buloba abu, ne kusòmbabò mu buloba abu, bu cintu cyabo. Nenku katwenaku twimanyina pa dibingishiibwa, dijidiibwa nansha. Tuyaayi batùngùnùke too ne ku dibatiiza dya Nyuma Mwîmpè. Katwimanyinyi pa kwitabuuja Mukalenge Yesu, kubatijiibwa to. Katwimanyini ne bwalu Yèyè wátùkezùlù ku nsòmbelu wa mpekaatu to. Kadi mpindyewu twatungunuku ne kulwangana mvita too ne ku dibwela dya mu kaaba kampanda, too ne ku mulayi wa Nyuma Mwîmpè. Bwalu Peetèlò wàkamba, mu Dituku dya Mpenta ne: “Bwalu mulayi awu wùdi bwenu nwênù, ne bwa bàna beenu balela, ne bwa bònsò bàdi kule, mu bùngi bwònsò bwàbìikilà Mukalenge Nzambi wetù abu.”

47 Pa nanku, Efeso kaaba aka ùdi ùtùshikika bu Yoshùwà, bilondèshile myaba. Nudi numona ne, Yoshùwà, paanyima pàà yèyè mumane kusabuka ne muubwele mu buloba abu, ne kukwata buloba, pashishe wàkaabanya buloba abu. “Efàlàyimà *apa*, Maanàsè *apa*, ne ewu nunku *apa*, Gaadà *apa*, Benyàmìnà *apa*.” Yèyè wàkaabanya buloba abu.

48 Kadi monaayi! Kaa, eci's cidi anu cìlàkusha myoyi yetu kapyà's! Yònsò wa ku baamaamù bàà beena Ebelu abu, pa kulela

kwa biine bânà abu, yéyè ùvwa ùjikula dînà mene dya mwaba awu, dîbà dya bisaamà byèndè bya pa kulela adi, mùvwàbo mwa kuteekiibwa pa myaba yabo mu buloba bulaya amu. Kaa, s'ndilonga dinene! Bu twètù mwa kubwelamu mu tusunsudi, cidì cifwànyine kwangata mèbà ne mèbà. Dîngà dituku patwikalà balongòlwèshe ekeleeziya wetù ewu, ndi muswe anu ndwe ngangate ngondo mujimà anyì yibidi, kadi kushààla anumù. Tàngilàayi pàvwàbo, yònsò wa ku baamaamù abu, pàvwàye anu ùbiikila ne: “Efàlàyimà,” pàvwàye mu bisaamà bya pa kulela apu, ùvwa ùmutèèka mwaba wùvwà makàsà èndè àsòmbela mu maanyì. Anu menemene yònsò wa kùdìbo nansha bòbò bàsanganyiibwa penyì!

⁴⁹ Kadi Yoshùwà, kàyi mumanye ciine eci to, kadi ku disonsodiibwa, mulombola kùdi Nyuma Mwîmpè, paanyima pàà mumane kubwela mu buloba bulaya abu, kupeeshaye muntu ne muntu mulayi wèndè, anu menemene cìvwà Nyuma Mwîmpè mulayile ku dilediibwa kwàka aci.

⁵⁰ Mùdi Nzambi muteeke bamwe bantu mu ekeleeziya, ku bisaamà bya pa kulela's we! Kaa, mîngà misangu bilwa bikole bya dikema's. Pàdi ekeleeziya ùtwa mikemu ku dikengeshiibwa dya kùdi bantu bàà pambelu, mwikàle wìtabuuja Mukalenge Yesu, wìtabuuja ne mulayi wa Nyuma Mwîmpè wùdi kutùdi cintu cilelela menemene anu mùvwàwu bwa Mpenta amu, mushindu wùdìbo bàtwa mikemu ne bàdila myadi mu bisaamà bya pa kulela apu's we! Kadi pàdìbo bàlediibwa, ne bàlediibwa mu Bukalenge bwa Nzambi bilondèshìle myaba, dîbà adi Nyuma Mwîmpè ngwateeki mu ekeleeziya awu, bamwe bapostolo, bamwe baprofeta, bamwe balongeshi, bamwe bampaasata, bamwe batangadiki. Dîbà adi Yéyè mmufile mwômò amu, dyakula dya mu myakulu, dyandamuna dya myakulu, dimanya, lungenyi, mapà a dyondopa, bishima bya mishindu yònsò.

⁵¹ Mwaba wùdi ekeleeziya...Mpindyewu aka ki kiipacila kândi naaku mu dyenza dya cyôci eci. Ekeleeziya ùtu misangu yònsò anu ùteeta bwa kwangata ditumba dya muntu kampanda mukwabo. Kadi kwènjikù nanku to. Wèwè kwèna mwa kudima matalà mu ditumba dya Efàlàyimà to, pawikalà wèwè Maanàsè. Bidi bikèngela bwa wèwè kwangata keebe kaaba mu Kilisto, ukàngata bilondèshìle myaba. Kaa, bidi byènda biya mu ndondo ne bilwa bibanjìke patùdi twenda tubwela mwômò emu apa, mushindu wùdi Nzambi ùtèèka muntu mu ekeleeziya bwa kwakulaye mu myakulu, mukwabo. . . Mpindyewu, tukààdi bayilèyilè misangu yàbùngì ne, “bidi bikèngela bwa twètù bònsò kwakula mu myakulu.” Aci's ncyà mafi. “Bidi bikèngela bwa twètù bònsò kucyenza.” To, kabyena nanku to. Bòbò bònsò kabaakenza cintu cimwe to. Muntu ne muntu ùvwa. . .

⁵² Muntu yònsò, buloba bwakafidiibwa ne bwakaabanyiibwa ku disonsodiibwa. Ne, muntu yònsò, ndi mufwànyine kwangata Mifundu ne kunuleejaci anu menemene ne, yéyè wàkabàtèèka

mu mwaba wùwàbò ne cya kwikala, bilondèshile myaba, mùwàbì ne bitùpà bibidi bya cisàmbà abi bìvwa bikèngela bwa kushààlabì dîshiyà dya musulu, mushindu wùwà baamamwàbò bacyàmbè mu lubila lwàkeelàbò dîbà dya kubalelabo adi, ne mùwà mwaba ne mwaba wònsò ne cya kwikala.

⁵³ Nenku mpindyewu paanyima pàà wèwè mumane kubwela, kî mbwena kwamba ne washàadi mudikàdile bwa kùciyi ulwangana mvita to. Bicidi anu bikèngela bwa wèwè kulwangana mvita bwa ka-centimètre kònsò kàà buloba bùdì mwimanepu abu. Pa nanku, nwamonu's, Kaanààna kàvwa ùleeja Dyulu dya butumbi adi to, bwalu bìdi anu mvita ne ndululu ne dishebeyangana ne mafwilakanyi, ne bikwabo. Kadi civwà cìleeja ne, bìdi bikèngela bwa kwikalaci lwendu lupwàngàne.

⁵⁴ Ki mwaba ngwòwò awu wùdì ekeleeziya ùpangila leelu ewu, pa lwendu alu. Udi mumanye ne nansha diditwàla dyebe wèwè mwine adi didi mwa kupangisha muntu mukwabo bwa kwondopiibwaye anyi? Diditwala dyenu dibi dya mpekaatu yenu kayiyi mitonda adi, nwènù beena kwitabuuja, s'didi mwa kufikisha ekeleeziya ewu ku dipangila byènza ne bya mwadi. Ne ku Dituku dya Cilumbulwidi wèwè ki wàmbula bujitu bwa kantu ne kantu kàà cyôci aci. "Kaa," mùdì wamba: "mpindyewu, anjì indilàbì kakese tǔng, Mwaneetu Branham." Ee, aci's m'Bulelela. Anjì elààyibì meeji ku bwalu abu!

⁵⁵ Yoshùwà, paanyima pàà yèyè mumane kusabuka mubwele mu buloba abu, Nzambi ùvwa mumupeeshe mulayi wa ne . . . Anjì elààyibì anu meeji tǔng, kulwangana mu kampanye kajimà amu kàyi ùjimija muntu nansha umwe to, kàyi ùpetakù luzadi lumwela pambidi, kabiyi bìkèngela kwikala ne munganga, anyi dyondopa dya lukasalukasa anyi mukusu wà kuswika pa mputa to. Amen. Nzambi ùvwa mwambe ne: "Buloba abu mbwenu, nda kalwanganaayi." Elàayi meeji, kulwangana mvita kampanye kajimà, biine abi kakùyiku Nkuruse Mukunze to nansha kakese, kakùyi bya ne muntu nansha umwe neatapikeku mputa to!

⁵⁶ Kadi bôbò kushebeya beena Amòlà ne beena Hitì, kadi kakùvwaku muntu nansha umwe mutapike munkaci mwabo to too ne pàakalwà mpekaatu kubwela mu cituudilu. Nenku pàakangatà Akànà civwalu cya beena Babulona aci ne mulungu wà ngòlò awu, ne kubisokokaye mwinshi mwa cituudilu cyèndè, ki dituku dyàkalondà kujimijabo bantu dikumi ne basambombo. Yoshùwà kwambaye ne: "Imanyikaayi! Imanyikaayi! Anjì indilaayi kakese, kùdì cintu cidì kaciyi cyènda bimpèto! Kùdì cintu cidì kaciyi cyènda bimpè mwab'ewu. Netweleshe dīyī bwa kujila kwa byakudya kwa matuku mwandamutekete. Nzambi mmutupeeshe mulayi ne: 'Katwakwikala ne kaputa nansha kamwe to.' Beena lukuna beetu nebapone ku makàsà etu twètù eku. Kadi kùdì cintu cidì kaciyi cyènda bimpè mwab'ewu. Cintu kampanda ncipampalamuke mwaba kampanda, bwalu tudi ne bantu bafwè dikumi ne basambombo bajimà balààle panshi

mwab'ewu. Bôbò aba's mbânà beetu beena Izaleela, kadi nyewu bafwè.”

57 Bâakafwà bwa cinyi, bantu kabàyi benze bwalu? Bwalu muntu umwepele ùvwa musambuke mukàlù. Nudi numona bwa cinyi bìdì bikèngela bwa cyôci eci kulongeshiibwaci anyi? Ekeleeziya munkaci mwa kuditeeka mu njila, kuditeeka mu njila wa Diyì dya Nzambi, kuditeeka mu njila wa Nzambi ne kuditeeka mu njila muntu ne mukwèndè, kwenda balulàme anu menemene, ne dicincika dya myanda, kumpala kwa bantu bônso, biikàle tuciina Nzambi. Bwalu muntu umwepele wàkiiba civwalu kampanda, ne mwenze cintu kampanda cìwà kacìyi cìkèngela bwa kwikalaye mwenze to, kufwishaci bantu dikumi ne basambombo! Ngeela meeji ne bàvwa dikumi ne basambombo, pàmwàpa bapite ne piine apu. Ngeela meeji ne bàvwa mbantu dikumi ne basambombo bàakafwà.

58 Yoshùwà kubiikilaye, kwamba ne: “Kùdi cintu cìdì kacìyi cyènda bìmpè! Nzambi mmufile mulayi, kadi kùdi cintu cìdì kacìyi cyènda bìmpè.”

59 Patùdì tulwa ne babeedi kumpala kwetu, ne bàpanga kwondopiibwa, bìdì bikèngela bwa twètù kwelesha diyì bwa kujilabo byakudya kakùyì tuseku to, kwelesha diyì bwa cisangilu. Kùdi cintu mwaba kampanda cìdì kacìyi cyènda bìmpè to. Nzambi mmufile mulayi, bikèngela bwa Nzambi kushààlaYe mukwate ku mulayi awu, ne Yèyè neàcyènzè.

60 Ki kweleshaye diyì bwa kujilabo byakudya. Ki kujandulabo, kwelabo nshòòbo. Ki Akànà kucitondaye. Ki kushebeyabo Akànà, dìkù dyèndè ne byònsò, ne kwoshabo butu bwabo, ne kubishiyabo mwaba awu bu civulukilu. Ki Yoshùwà kuyaye anu mutungunuke ne dilwangana dya mvita, wènda ùkwata byònsò, kàyì ne nì nduzadi lumwela anyi nì mputa mumutapa to. S'ki bwalu mbwòbù abu.

61 Dìngà dituku kumukengelabi ndambu wa dìbà, dìbà dya pamutu. Dìbà dikaavwa dyàmba kubwela, balumyana kabàyikù bafwànyine kulwangana mvita ayi bìmpè menemene mèbà a bufuku to. Yoshùwà, mulwanganyi munene wa mvita awu, mwela maanyi kùdi Nzambi, muteeka mu buloba amu bilondèshile myaba, byenze bu beena Efeso mu Ekeleeziya mupyamupya, ùkwàta, mukwàte, munkaci mwa kukwata buloba abu, ùbùkwata ku bukookeshi bwèndè. Kumukengelabi ndambu wa dìbà, pa nanku kwambaye ne: “Wèwè dìbà, imana kaaba kamwe!” Ki kwimanadi kaaba kamwe munda mwa mèbà matwe ku dikumi ne abidi, too ne pàakakwàtaye buloba abu. Nwamonu anyi?

62 Mpindyewu Mukanda wà Efeso wùdi wùtùtèeka mu Kilsto bilondèshile myaba, cìwàbo mu Buloba Bunsantu aci. Twètù tudi tuteekiibwa kì mmu Buloba Bunsantu to, kadi mmu Nyuma Mwìmpè! Mpindyewu túbalààyaakù anu Diyì dimwe cyanàànà, bwa kumona mùdì ekeleeziya mupwàngane:

Pòlò, mupostolo wa Yesu Kilisto ku diswa dya Nzambi, . . .

63 Kaa, ndi munangepu aci's we! Nzambi nguvwa mumuvwije mupostolo. Kí mbakulu bàvwà bamutentékele byanza to, kí mbeepiskopo bàvwà bamutùme mu mwaba kampanda to, kadi Nzambi nguvwa mumubiikile ne mumuvwije mupostolo.

Pòlò, mupostolo wa Yesu Kilisto ku diswa dya Nzambi, kùdi bansantu (aba bàvwà bajidiibwe) bàdi mu Efeso, ne kùdi beena lulamatu mu Yesu Kilisto:

64 Tàngilàayi numone mùdiye wàmbilangana cyôci eci. Eci kí nцитumina beena bupidya to. Eci nцитumina ekeleeziya. Cidi mbwà aba bàdi babiikidiibwe bwa kupatuka, bàdi bajidiibwe ne babiikidiibwe bàdi mu Kilisto Yesu.

65 Mpindyewu, panwikalà baswe kumanya mutùdi tubwela mu Kilisto Yesu, bu nwènù mwa kubuulula mu Kolinto wa Kumpala 12, mmwambe ne: “Bwalu ku Nyuma umwepele nkutùdi bônso babatiijibwe mu Mubidi wumwepele.” Munyi? Babatiijibwe ku cinyi? Nyuma Mwimpè. Kí nku dibatiiza dya mâyi to, nwènù beena Église de Christ, kadi ku N-y-u-m-a umwepele ne dileeta dinene, ku Nyuma umwepele. Kí nku dilabulangana dya ku cianza dimwepele, ku mukanda mufundilangana wumwepele, kí nku dimyaminangana dya mâyi dimwepele nansha. Kadi: “Ku Nyuma umwepele nkutùdi bônso babatiijibwe mu Mubidi wumwepele,” cintu cyetu, Buloba bùdi Nzambi mutupeshe bwa twètù kusòmbelamù, Nyuma Mwimpè. Anu mwàkapèeshàYe beena Yuda Kaanààna amu, Yèyè mmutupeshe Nyuma Mwimpè. “Ku Nyuma umwepele nkutùdi bônso babatiijibwe mu Mubidi wumwepele.” Nwacyùmvù anyi?

66 Mpindyewu, bàdiye wàmabila aba mbeena Kaanààna bàà mu nyuma, Izaleela, Izaleela wa mu nyuma udi mukwate buloba abu. Kaa, kanwenaayiku ne disanka dya munùkaadi bapàtùke mu màtùngulù a ayi a Ejiipitu awu anyi? Kanwenaayiku ne disanka dya munùkaadi bapàtùke mu cipeela anyi? Nenku, vùlukàayi ne, bivwà bikèngela bwa kudyabo manà, cyakudya cya Banjelo cya mu Dyulu aci, too ne pàakalwàbo kusabuka ne kubwela mu buloba abu. Nenku pàakalwàbo kusabuka ne kubwela mu buloba abu, ki manà kulekelawu kumata. Bòbò bàkaavwa babobè bapwile dîbà adi, nenku bàakadyà blé wa kale wa mu buloba abu. Mpindyewu, mpindyewu unùdi kanùciyi kabidi bânà bàà mu maboko, mpindyewu unùdi kanùyi nujinga mabeele a meeji matooke a Evanjeeliyo, mu mushindu wa ne kabyena bikèngela bwa kwikalabo bânwèngeleka to, ne bânùlaabidila, ne banuswishisha bwa kulwa mu ekeleeziya, mpindyewu unùkaadi beena Kilisto babobè bapwile menemene ewu, nukààdi badilongòlòle bwa kudya cyakudya cikole mpindyewu. “Nukààdi badilongòlòle bwa kubwela mu cintu kampanda,” mwàkambàye. Nukààdi badilongòlòle bwa kuumvwa cintu kampanda cya ndondo

ne cibanjike. Kaa, netubwelemu buludi. Nenku, kaa, cìvwa cisokoka anu kacya ku difuka dya dyulu ne buloba. Yèyè mmwambe ne: “Mpindyewu unwabwedi mu eci ewu, nwênù mbândi ngambila eci abu.” Kí ng’aba bàcìdì bùùmukilakù mu Ejiipitu to, kí ng’aba bàcìdì mu lwendu to, kadi ng’aba bàdì bàsanganyiibwà mu buloba bulaya, bàdì bapetè mulayi abu.

⁶⁷ Mbanganyi bàdiku bapetè mulayi wa Nyuma Mwîmpè? Kaa, kanwenaayiku ne disanka dya munùkaadi nusanganyiibwa mu buloba abu anyi? Mwab’ewu mpindyewu, munkaci mwa kudya blé wa kale awu, munkaci mwa kudya bintu bikole bya Nzambi ne bapetè dyumvwa ditooke tòò. Meeji ebe—ebe a nyuma àkaadi ónsò mapatuke mu cibwejàkàjì. Udi mumanye anu menemene ne Yèyè ùdì Nganyi. Udi mumanye anu menemene ne Yèyè ùdì cinyi. Udi mumanye anu menemene ne kùyaayà nkwepi. Udi mumanye anu menemene byònsò pa Cyòci aci. Udi mumanye Yèyè ùdì mwitàbùùje ne mutwishiiibwe ne Yèyè ùdì ne bukole bwa kulama cyùdì muMupeeshe too ne ku dituku adi. Kaa, ki yèyè, ki yèyè awu udi Pòlò wàmbila mpindyewu awu. Tèèlejàayi ne ntema. Tàngilàayi mpindyewu.

. . . *beena lulamatu mu Kilisto Yesu:*

⁶⁸ Mpindyewu, ndekelèku ekeleeziya àmbululè aci. Mmuniyì mutùdì tubwela mu Kilisto? Mu kushààla bàà mu ekeleeziya anyi? To. Mu kufunda kwa dìnà dyetu mu mukanda kampanda anyi? To. Mu kubatiijibwa ku diinyijibwa mu màyi anyi? To. Mmuniyì mutùdì tubwela mu Kilisto? Ku Nyuma Mwîmpè umwepele nkutùdì bònsò babàtìijibwe mu mulayi wumwepele, Mubidì awu, ne tulwa baabanyanganyi bàà byònsò bidì bya mu buloba abu. Amen! Kaa, ndi—ndi munangepu aci’s we. Bu ne ncìvwa ne díyì dimpate to, mvwa mwa kwela mbila. Ekelekele, pàndì mbwela mu buloba ebu, s’bùdì bùshààla bwányi. Ndi kwànyì kumbelu mpindyewu; ndi mu Kaanàànà. Ndi nkookela cyònsò cìdì Nzambi muswe kukwacila naanyì mudimu aci. Ndi ngendela pa malaba mansantu, mwànà wa Mfumu awu, muvjàdika muzàbì pambidi pajimà ne mudilongolole. Nkàadi mupatuke mu Ejiipitu, mulwe too ne mu buloba bulaya, mutambe mateeta bukole, musabuke Yadènè mubwele mu mulayi mubènèshiiibwe ewu. Kaa, ndi mucipete muniyì? Ku Nyuma wumwepele. Anu mushindu wumwewumwe wàkaCipetà Pòlò awu, cyenze pa mêmè anu mushindu wumwewumwe wàkenzàCi pa yèyè awu, mushindu wumwewumwe wùdìCi cyenze pa wèwè awu. “Ku Nyuma umwepele nkutùdì bònsò babàtìijibwe.” Katùyì bamyaminyiibwe màyi, anu dimyaminyiibwa dyàCì dikese cyanàànà, mêmè ndyùmvwakù bilenga to; kadi mwinyijibwe mwinshi mwàmwa! Tutu bònsò benjiibwe bwa kwowela mwinshi mwàmwa, mu Nyuma Mwîmpè. Ki mulayi ngòwò awu.

⁶⁹ Beetu beena Efeso, wetù Yoshùwà, udi Nyuma Mwîmpè awu, *Yoshùwà* mbwena kwamba ne “Yesu, Musungidi.” Yoshùwà

mwikàle ùmvwija Nyuma Mwîmpè ùcileeja mu nyuma mùvwà cyòci aci mu mubidi amu ne, Yèyè ngudi wetù Mulwanganyi munene wa mvita. Yèyè ngudi wetù Mulombodi munene. Anu mùvwà Nzambi ne Yoshùwà amu, ki mùdì kabidi Nzambi (mu Nyuma Mwîmpè) ùtwèndesha eku ne eku. Ne pàdì mpekaatu ùfika mu cituudilu, Nyuma Mwîmpè ùdi ùtùma dîyì bwa kwimana ne: “Ncinyì cìdì kaciyi cyènda bìmpè mu ekeleeziya ewu? Kùdì cintu cìdì kaciyi cyènda bìmpè to.” Kaa, kanwenaayiku numona mutùdì ne bàna bàà Kishà bapitepìte bùngì mpindyewu emu anyì? Ba-Shawùlà bapitepìte bùngì bafùmìne mu maaseminere ne mu bilongelu bya teoloji bàpàtukamù ne bàlongesha bintu bya kanyawu ebi, anu mwàkambà Bible ne nebènzè amu. “Byenze bu ne, kabeena ne Diitabuujà to, biikàle bàtàpuluka kunùdì, kabàyi ne bwobumwe nansha bukesè neenu to, ne bikwabo, biikàle ne cimwenekelu cya difwana dya Nzambi, kadi bàbènga bukole bwàdì, epukaayi bàà nanku awu.” Bòbò abu kî mbamanye ne mbafumine penyì to, kabeena mwa kufila kabingila nansha kakese to.

⁷⁰ Ndi ngamba eci cya kùdì Mwaneetu Booth Clibborn, mulunda wanyì, pìikalàbì ne kùdikù cintu kampanda cìdì cilela mu masan-. . . cilela mu masandi kaciyi cifùka kùdì Nzambi to, cintu kampanda pa buloba apa, nkampundu. Kampundu kadi ki cintu cìdì citàmbe kwikala cya ciipanshi ku bintu byònsò. Kòkò kàtu. . . kòkò—kòkò kakàtu kamanye cidìku to. Kakeena mwa kuvulanganaku kabidi to. Kampundu kabeena mwa kukàsangisha ne kampundu kakwabo kadi kupeta kampundu to. Kwàkù nkujikè. Kî nkamanye ne wakù tatwàkù mmufùmìne penyì to, anyì mene mamwàkù kî nkamumanye to, bwalu kòkò nkampundà kakesè—kakesè ne kabalu kakaji. Kacyapu Nzambi kàtukù mwenze aci to. Kanwimikidiku Nzambi cintu bu nanku to. Nzambi kàtukù mwenze aci to. Nzambi Yèyè wàkamba ne: “Cintu cyònsò necivulanganè bilondèshile mushindu wàci.” Eyowa’s, mukalenge. Kadi kampundu kòkò kàdì—kàdì. . . tatwàkù ùvwa mpunda ne mamwàkù ùvwa nkabalu kakaji, pa nanku kî nkamanye ne nkàà luseke kaayi to. Kòkò—kòkò—kòkò nkabalu kiikàle kàteeta bwa kwikala kampundu, anyì kampundu. . . anyì—anyì kàdì kabalu kàteeta bwa kwikala mpunda, mpunda ùteeta bwa kwikala kabalu. Kî nkamanye ne nkàà luseke kaayi to. Ne kòkò nkantu kàà katàmbe kupapa mutu kàtuku pa buloba. Kwèna mwa kuteekaku dyeyemena nansha dikese mu kòkò to.

⁷¹ Nenu mushindu awu ngùdì bantu bààbùngì mu ekeleeziya. Kî mbamanye ne tatwàbò nganyì, kî mbamanye ne mamwàbò nganyì to. Cintu cimwepele cìdìbò bòbò bamanyà ncyà ne, anyì mba-Presbytériens, ba-Méthodistes, ba-Baptistes, anyì beena Mpenta, anyì cintu kampanda. Kî mbamanye ne kùdìbò bafumine nkwèpì to. Nenu mpunda mukole, wèwè udi anu mwa kumwela mbila bùngì bwònsò buwàswà kumwela abu, kadi neashaale mwimane mwab’awu kacya anu wàtàdika

maci manene awu, mutangile. Wêwê's udi mwa kubayiisha bufuku bujumà, kadi kabàyikù bàmanya kantu nansha kàmwè pùumukàbo kupita pàvwàbo bàlwa to. Mpindyewu, aci's ncyà bushuwa. Ncyèna ne meeji a kwikala ne cyakwidi cikàyàbàle to, kadi ndi muswe kunwambila Bulelela.

72 Kadi kùdi cintu cimwepele cìdìbo mwa kwenza, mbeena mudimu bìmpè. Kaa, bàdi bôbò anu bàkwàta mudimu, bàkwàta mudimu, bàkwàta mudimu, bàkwàta mudimu. Aci's cìdi cìtùma meeji àànyì ku musùmbà wà ba-Arminiens bàdi misangu yònsò anu bàteeta kukwata mudimu bwa kubwela mu Dyulu. Aci's ncyà bushuwa, kampundu's. Kaa, Cyapu cya Dyambulwishangana cya Bainàbànzà, ne didiishangana dya nzoolo ya bibèmbà, bwa difutu, dya muyiishi. "Nenku bìdi bikèngela bwa twètù kwikala ne maja kampanda, ne fètè kansanga." Bìdi anu mudimu, mudimu, mudimu, mudimu, mudimu, mudimu, mudimu. Kadi, bôbò biine, cìdìbo bàkwàcila mwine mudimu awu ncinyi?

73 Paùdì ubèèla lukonko ne: "Nukààdikù bapete Nyuma Mwímpè kacya nwítabuujà anyi?"

74 Bàdi bàtádika maci, ne kabàyikù bàmanya ne mbàà luseke kaayi to: "Cyùdi muswe kwamba ncinyi? Byònsò *ebi* mbifumine penyì? Cyùdi uswa kwamba ncinyi, bwa Nyuma Mwímpè? Mèmè ncìtukù mwanjì kuumvwa cintu nansha cimwe pa Bwalu abu to. Kaa, wêwê's udi ne cya kwikala mukoleshi wa maalu wa mushindu kampanda." Nwamonu's, kî mbamanye ne papa ùvwa nganyi, anyi ne mama ùvwa nganyi to. Nenku bikèngela ùbàtuutè pa cintu kanà cyònsò cyùdi wenza aci, utuuta *apa*, utuuta *pààpa*, ne utuuta *apa*, utuuta *pààpa*. Aci's ncyà bushuwa, kampundu kàà kale.

75 Kadi, ndi nwwambila's, kabyena bikèngela bwa wêwè kwenza nanku bwa kabalu kalelela kakùna ku dikàsà to. Wêwè udi ukèèla anu mfimbu musangu wumwe nunku anyi, mwaneetu, ki kòkò kàyaayà aka. Nkamanye cìdìku kènza. Kaa, mushindu mwine wùdìbi bilenga paùdì ubànda pa kabalu kalelela kakùna ku dikàsà's we! Mushindu mwine wùdìbi bilenga bwa kwamba ne: "Vwila apa, kalumyana." Kaa, mulumyana, bikèngela wikalè mukwate bikole's, kòkò's nekàtuukè lubilu cisòmbedi aci cishààla mu lupeepele.

76 Ki mùdìbi nanku ne beena Kilisto balelela bakùna ku dikàsà. Aleluuyah! "Akidilaayi Nyuma Mwímpè. Nyingalalaayi, muntu ne muntu wa kunùdi, nubatiijibwe mu Dìna dya Yesu Kilisto, bwa dilekelediibwa dya mpekaatu yenu." Kujikè, ne lukasa lwònsò bwa kufika ku màyì, mbamanè kuya. Kabeena mwa kupeta diikisha nì mmuunya nì mbufuku pàdìbo kabàyi bapetè Nyuma Mwímpè to. Bwa cinyi? Nudi bamanye's, mwena Kilisto mmumanye Papa wendè ne ùvwa nganyi. Nwamonu's, bìdi bikèngela babidi bwa kwenza dilediibwa. Ncyà bushuwa, papa ne maman. Kampundu kî nkamanye ne papa waku ùvwa nganyi,

ne maman waku ùwva nganyì to. Kadi twètù tudi bamanye ne Papa ùwva nganyì ne Maman, bwalu tudi balela ku Dìyì difunda dya Nzambi, dishindika kùdì Nyuma. Mu Dituku dya Mpenta, Peetèlò wàkamba ne: “Nwènù banyingàlále ne babàtìjìibwe, muntu ne muntu wa kunùdì, mu Dìnà dya Yesu Kilisto, bwa dilekelediibwa dya mpekaatu yenu, nenupete kupa kwa Nyuma Mwîmpè.”

⁷⁷ Nenku, mwaneetu, mwena Kilisto mulelela mulediibwe cyakabidi, (kaa, ekelekele) wendè nyuma, pàdìye anu ne wàpèci Dìyì anyì, ùdì ùmba ùpeta ne Nyuma Mwîmpè. Mukonkààku cintu kampanda tũng dîbà adi! Yèyè’s mmumanye pàdìye mwimanyine. “Udi witabuuja dyondopa dya kùdì Nzambi anyì?”

“Amen!”

“Udi witabuuja Dilwa dya Cyakabidi anyì?”

“Amen!”

⁷⁸ Anjì konkabi kampundu ciine aci tũng. Ntendeleelu wa kampandu: “Uh, ncyèna mumanye bwalà. Docteur Jones ùwva mwambe musangu kampanda . . .” Huh! Apu, tungunuka wèwè anu ne kwenda kulonda Shawùlà. Nwamonu anyì? “Kaa, kí mbamanye to. Ee, ndi nkwabila’s, wanyì ekeleeziya kí mmutwishiibwe bwa Cyôci aci to.”

⁷⁹ Kaa, mwaneetu, kadi mulume ne mukaji balediibwe cyakabidi’s mbatwishiibwe anu menemene bwa dilwa dya Mukalenge Yesu, mbatwishiibwe ne bàdì ne Nyuma Mwîmpè anu mùdìbi ne kùdì Nyuma Mwîmpè udi ne cya kupeeshiibwa amu.

⁸⁰ Mpindyewu, Yesu wàkamba . . . Mukaji wa ku ciina cya mâyì awu: “Twètù tutu tukuukwila ku mukuna ewu, kadi beena Yuda bôbò bàdì bàkuukwila ku Yelusalema.”

⁸¹ Yèyè kwamba ne: “Mukaji, teeleja Mèyì Àanyì! Dîbà dilwalwa, ne ki dyôdì edi mpindyewu, didì Taatù ùkèba aba bààMukuukwilà mu Nyuma ne mu Bulelela.”

⁸² “Dìyì Dyebe didi Bulelela.” Ne muntu yònsò wâbala Bible ne wítabuuja Dìyì dyònsò didì Bible wàmba, ne wâlonda mibelu Yèndè, ne wâpeta Nyuma Mwîmpè umwèumwè wâkapetabò, mushindu wumwewumwe wàkaMupetàbo bôbò awu, bipeta bimwebimwe byâkapetàbo ku Yèyè abi, bukole bumwebumwe bwâkapetàbo pààkaMupetàbo apu, yèyè mmumanye ne Papa wendè ne Maman wendè bàvva banganyì. Mmumanye ne yèyè mmusukudiibwe mu Mashi a Yesu Kilisto, mulediibwe kùdì Nyuma, muujiibwe ne dilaabiibwa dya Nzambi. Yèyè mmumanye mwaba wùdiye mwimanyine. Bushuwa’s! Yèyè ùdì mu Kaanàànà. Mmumanye kùdiye mufumine. Ki mùdìbi nanku ne mwena Kilisto mulelela. Ùmukonkèbi ne: “Wèwè ewu ukàadi mupete Nyuma Mwîmpè kacya wítabuuja anyì?”

“Amen, mwaneetu!”

83 Mwya mwimane dīngà dituku ku luseke lwà munsantu mukaji kampanda, wa bidimu makumi citeema ne bibidi, mwikàle ùyiikilangana ne mpaasata wendè wa bidimu makumi mwandamukulu, mêmè kwamba ne: “Kaakwé?”

Mwikàle anu musàngàle ne mwèndè mwônso, kwambaye ne: “Yě, mwanàànyì wa balume.”

84 Mêmè ne: “Udi mupete Nyuma Mwîmpè kùkaadi ntanta bule kaayi?”

Yèyè ne: “Butumbi kùdì Nzambi’s we! Kùdì bidimu bitwe ku makumi asambombo kùnkaadi muMupete.”

85 Mpindyewu, bu ne yèyè awu ùvwa kampundu, nunku’s mmwambe ne: “Mpindyewu, anjì indilabi kakese tūng, mwya mupete kòmfirmasiyò ne mummyaminyiibwe màyi pamutu pâmvwà. . .Ee, cya bushuwa, ki kuyabo naanyì mu ekeleeziya ne mêmè kapeesha *kampanda* mukanda wànyì mufundilangana awu.” Kaa, luse’s we! Kabàyi nansha bamanye ne mbàà luseke kaayi to.

86 Kadi yèyè awu kaayi ùvwa mumanye kùdì bwanààbutà bwèndè bufumine. Yèyè ùvwapù pàvwàbi byenzèke. Yèyè mmulediibwe kùdì màyi ne kùdì Nyuma. Ùvwa mumanye, ne màyi ku disukudiibwa dya ne màyi ku Dìyi, bikèngela Dìyi.

87 Mpindyewu tàngilàayi mùvwà cyòci eci citùmiiibwe: “Kùdì aba bàdì mu Kilisto Yesu.” Pòlò, mpindyewu, nwavulukaaayi ne. . .Ndi ngangata ntanta mule, kadi ncyakujikija nshapita ewu to. Kadi nèndwijakajè. . .Nudi bacinange anyi? Kaa, Cìdi citwàmbila mwaba wutùdì, kadi katwena mwa kucijikija anu mu diloolo dimwepele cyanàànà to. Bidi bitùkèngela ngondo mujimà anyi yibidi bwa cyòci eci, diloolo dyònsò, anu bwa kuCikenketa cyònsò cyanàànà, ku Dìyi ne ku Dìyi. Kwalukila paanyima kadi kucipàtwila mu maalul-malonda ne kucyàdija patooke, ku Dìyi ne ku Dìyi, bwa kunuleeja ne Cìdi Bulelela. Mpindyewu, ngànji mbalululeku mvensa awu lukasalukasa.

Pòlò, mupostolo wa Yesu Kilisto ku diswa dya Nzambi (kakùyi ku diswa dya muntu to), kùdì bansantu bàdì mu Efeso, ne (mutwangaji) kùdì beena lulamatu mu Kilisto Yesu:

88 Mbwena kwamba ne: “Mbabiikidiibwe bwa kupatuka, batàpulula, ne mpindyewu babàtùjiiibwe kùdì Nyuma Mwîmpè, ne biikàle mu Kilisto Yesu. Nwènù mbàndi mfundila mukanda ewu, nwènù bananga bàànyì.” Kaa! Ndi ngeela meeji kùdì Pòlò mwikàle naabo kuntwaku mpindyewu mene, kaa, disanka kaayi’s we! Mupostolo mukese wa kale awu bàakamukòsa mutu kuntwaku. Mêmè ngàkiimana mwaba mwine wàkamukòselàbo mutu awu. Kadi, kaa, mutu wèndè wùdikù ku mubidi mupyamupya awu, ne kawena mwa kukoshiibwaku kabidi to. Ne yèyè mmwimane mwàmwa naka pamwe naabo mu kasunsa mene

aka, mupostolo umwèumwè wâkafûnda Cyôci eci awu. Nenku wâkamba ne: “Kùdi nwênù bàdi mu Kilisto Yesu! Ku Nyuma umwepele nkutùdi bônso babàtìjìibwe mu Mubidi wumwepele.” Mpindyewu tângilàayi.

Ngàsà ikalè kunùdi, ne ditalala, bya kùdi Nzambi Taatù wetù, ne . . . Mukalenge Yesu Kilisto.

Nzambi ne Taatù wa Mukalenge wetù Yesu Kilisto abeneshiibwe, yêyè udi mutubeneshe ne ônsò . . .

Kaa, udi umvwa aci anyi, Charlie?

. . . udi mutubèneshe ne mabènesha ônsò a nyuma . . .

⁸⁹ Kabiyi anu ndambu kùdi bapostolo, ne ndambu kùdi *cikampanda* to, kadi Yêyè mmutubeneshe ne mabènesha ônsò a nyuma. Nyuma Mwîmpè umwèumwè wâkapweka mu Dituku dya Mpenta awu n’Yêyè Nyuma Mwîmpè umwèumwè awu kaaba aka diloolo edi. Nyuma Mwîmpè umwèumwè wâkafikisha Mariya ku dyela dya mbila ne ku dyakula dya mu myakulu, ne ku dipicila dya mu cikondo cilenga ne cya dicyonkomoka, ne bintu byâkenzâye abi awu, n’Yêyè Nyuma Mwîmpè umwèumwè awu kaaba aka diloolo edi. Nyuma Mwîmpè umwèumwè wâkalekela Pôlò pa mazuwa a kale a mâyi awu, mùvwà mwenze bu ne àvwa mùle tente ne mâyi ne àkaavwà mayè, munda mwa matuku dikumi ne anaayi a muunya ne a bufuku, kakùyì ní nngondo ní mmitooto. Kutàngilaye kwâka ne divwala dyônso diikâle ne démon musòmbepù, utâpa dîsù, ne ùkenya ku mênù, wâmba ne: “Mémè nênkwinijè, wêwè mulumyana ewu, mpindyewu. Bwa mpindyewu kaayi ngaakupeci.”

⁹⁰ Kadi pàvwa Pôlò ùyà bwa kenzaku anu kaadisambila kakese, ki Mwanjelo udi mwimane wàwa, wâmba ne: “Kuciinyi nansha, Pôlò. Mazuwa a mâyi a kale aa neakanyangukile mu cisanga kampanda. Ndâaku ukadye cyakudya cyebe cya diloolo, maalu àdi enda bimpè mpindyewu.”

⁹¹ Ki yêyè ulwâlwa ewu ne minyòòlòlò ayi ku tuboko twèndè tukese tukulakaji atu, wènda ùdikòka naayi biteketebitekete ku makàsà, kwambaye ne: “Koleshaayi mwoyi, balumyana, bwalu Nzambi, Mwanjelo wa Nzambi, ùndi mémè musadidi Wèndè, ùvwa mwimane ku luseke lwànyi ne wâmbi ne: “Pôlò, kuciinyi nansha.” Nyuma Mwîmpè umwèumwè awu ùdi kaaba aka diloolo edi, Nyuma umwèumwè wa Nzambi awu, mwikâle ùtùpèèsha mabènesha amweamwe a nyuma awu.

. . . mutubeneshe ne mabènesha ônsò a nyuma mu myaba ya mu dyulu . . .

⁹² Kaa, twânjì twìmanàayi kabidi kasunsa kamwe kaaba aka. “Mu myaba ya mu Dyulu.” Mpindyewu, kacyi anu mu mwaba wônso nâka to, kadi mu myaba ya mu Dyulu. Tudi badisangishe mu myaba “ya mu Dyulu,” mbwena kwamba ne mwaba wâ mwena kwitabuuja. Aci cidì ne, mémè mu cyuyüyà cya disambila, wêwè mu cyuyüyà cya disambila, anyi ekeleeziya

mu cyuyūyà cya disambila, ne twètù biikàle badilongòlòle bwa Diiyisha, ne badisangishe twètù bu bansantu, babiiikiibwe bwa kupatuka, babàtìijìibwe ne Nyuma Mwîmpè, buujìibwe tente ne mabeneshu a Nzambi, babiiikiibwe, basungùdiibwe, basòmbe pamwe mpindyewu mu myaba ya mu Dyulu, tudi bàà mu Dyulu mu misuuka yetu. Nyuma yetu mmitubweje mu cyuyūyà cya mu Dyulu. Kaa, mwaneetu! Ki bwalu mbwòbù abu's, cyuyūyà cya mu Dyulu! Kaa, ncinganyì cidiku cifwànyine kwenzeka diloolo edi, ncinganyì cidiku cifwànyine kwenzeka diloolo edi bu ne tuvwaku basòmbe kaaba aka mu cyuyūyà cya mu Dyulu, ne Nyuma Mwîmpè munkaci mwa kunyungisha mwoyi ne mwoyi wònsò wùdì mufukuludiibwe ne mulwe cifukiibwa cipyacipyu mu Kilisto Yesu? Mpekaatu yònsò mwinshi mwa Mashu, mu dikuukwila dipwàngàne, ne byanza byetu byela muulu kùdì Nzambi ne mwoyi yetu mibàndisha kuulu, basòmbe mu myaba ya mu Dyulu mu Kilisto Yesu, biikàle tukuukwila pamwe mu myaba ya mu Dyulu.

⁹³ Kacya ukààdikù musòmbe mu wumwe wà ku yôyi anyi? Kaa, mêmè nkààdikù musòmbemù too ne pâmvwà mwa kudila mwadi wa disanka ne kwamba ne: “Nzambi, kundekediku nguumuka kaaba aka to.” Anu myaba ya mu Dyulu mu Kilisto Yesu pa yôyi's!

⁹⁴ Mwikàle ütùbènesha ne cinyi? Dyondopa dya kùdì Nzambi, didyànjila-kumanya, dibuulula, bikeena-kumona, makole, myakulu, dyandamuna, lungenyi, dimanya, mabeneshu ònsò a mu Dyulu, ne disanka dya kadìyi kwamba ne dyùle tente ne Butumbi, mwoyi ne mwoyi wònsò muujiibwe tente ne Nyuma, biikàle twenda pamwe, basòmbe pamwe mu myaba ya mu Dyulu, kakùyikù dyeji dibi nansha dimwe munkaci mwetu to, kakùyikù mucu wa mfwanka nansha wumwe munwibwe to, kakùyi kankanzu kîpi nansha kamwe to, kakùyikù *cikampanda*, *cikansanga*, anyi *cikankenga* nansha cimwe to, dyeji dibi nansha dimwe, muntu nansha umwe kàyikù ne bwalu bubi ne mukwèndè, muntu ne muntu wàkula anu mu dinanga ne mu dipetangana, bantu bònsò ne diyi dimwe mu mwaba wumwe, “ki dyakamwe kufumaku mu Dyulu mutooyi mwenze bu cipepele cikole cya civuma.” S'ki bwalu mbwòbù abu: “Mmutubeneshe ne mabeneshu ònsò a nyuma.”

⁹⁵ Dìbà adi Nyuma Mwîmpè mmufwànyine kupweka pa muntu kampanda, ne kwamba ne: “EMU MMÜDÌ MUKALENGE WÀMBA. Nda ku mwaba kampanda ùkenzè cintu kansanga.” Nùtangilàayi numone mùdici cyènzeka anu *nanku*. [Mwaneetu Branham ùdì ùtuuta cishondo—Muf.] Nwamonu anyi? “EMU MMÜDÌ MUKALENGE WÀMBA. Kenzè cintu kampanda mu mwaba kansanga.” Nùtangilàayi numone mùdici cyènzeka anu *nanku*. [Mwaneetu Branham ùdì ùtuuta cishondo.]

⁹⁶ “Mutubeneshe pamwe mu mabeneshu ònsò a mu Dyulu mu myaba ya mu Dyulu.” Tàngilàayi!

Bilondèshile mùdiye mutusungule . . .

97 Twètù mbàdì baMusungule, anyi Yèyè ngudi mutusungule? Yèyè ngudi mutusungule. Dìbà kaayi adi? Diloolo ditùvwà baMwitabe adi anyi? Musungule!

Bilondèshile mùdiye mutusungule munda mwèndè kumpala kwa difuka dya dyulu ne buloba, bwa twètù kwikala bansantu . . .katùyi ne cya ditùbanda naaci kumpala kwèndè mu . . . (mangumba anyi?) . . . mu dinanga,

98 Nzambi wàkatùsungula dìbà kaayi? Nzambi wàkakusungula dìbà kaayi wèwè udi mupete Nyuma Mwìmpè awu? Yèyè wàkakusungula dìbà kaayi? Kumpala kwa difuka dya dyulu ne buloba. Ku didyànjila-kumanya Dyèndè, Yèyè wàkadyànjila kukumona ne wàkamanya ne wèwè neuMunange. Ne kumpala kwa kwikalaku difuka dya dyulu ne buloba, Yèyè kukusungula, ne kutumaYe Yesu bwa Wàmòna mwa kwikala mulambu wà kujimija naawu mpekaatu yebe, bwa kukubiikila ku dikupungisha ne Yèyè mwine, bwa kunanga. Kaa, mvw’a kujinga bwa twikalakù ne ndambu mukwabo wa tusunsa twa dìbà’s.

99 Ndekelaayiku, kumpala kwa twètù kutamba kuya kumpala, ngààlukilèku paanyima, ku Genese 1.26. Nèmwangàte mu diisàtù. Pààkenzà Nzambi muntu . . . Kumpala kwa kwenzaYe muntu, Ûvwa ùdibiikila Yèyè mwine ne “El,” E-l, El; E-l-h, “Elah,” “Elohim.” Mwaku awu wùdi wùmvwija, mu cyena Ebelu ne, “ewu udiku ku yèyè mwine,” anu Yèyè nkààyèndè. Cintu nansha cimwe kacyaikiikalaku kumpala Kwèndè Yèyè to, Yèyè nguvwa diikalaku dyònsò divwàku, uvwa mwikàlekù ku Yèyè mwine! El, Elah, Elohim, mbwena kwamba ne “ewu udi mukumbane mu byònsò, wa ngulu yònsò, Wa bukole bwònsò, udi wikalaku ku Yèyè mwine.” Kaa!

100 Kadi mu Genese 2, pààkenzàYe muntu, Yèyè wàkamba ne: “Ndi,” Y-a-h-u, J-u-v-u-h, *Yahweh*, “Yehowah.” Cìvwa cyùmvwija cinyi? “Ndi Ewu udi diikalakù dyònsò Wàkafùka cintu kampanda ku Mèmè mwine awu, bwa ciikalè mwànà wa balume Wanyì, anyi mwànà mukese Wanyì wa citùpà cìpì, anyi wa kànàkànà.” Butumbi’s wè! Bwa cinyi? Wàkapèèsha muntu . . . *Yehowah* mbwena kwamba ne “Yèyè wàkapèèsha muntu bwa kwikalaye nzambi wa kànàkànà.” Bwalu Yèyè ùdi Taatù Nzambi, ne Wàkenza muntu nzambi wa kànàkànà, pa nanku Yèyè kàcyenà kabidi udi wikalaku nkààyèndè to, Yèyè ùdikù pamwe ne dìkù Dyèndè. Elah, Elah, Elohim. Mpindyewu, mpindyewu Yèyè ùdi Yehowah. *Yehowah*, ùmvwija ne, “Ewu udiku pamwe ne dìkù Dyèndè.” Mpindyewu, Nzambi wàkenza muntu bwa kwikalaye ne bwenzeji pa buloba bujimà, yèyè ùvwa ne mwaba wà bukookeshi. Nenku buloba mbùvwa mwaba wà bukookeshi bwa muntu. Aci m’Mufundu anyi? Nenku piikalàbi ne aci mmwaba wèndè wà bukookeshi, yèyè nguvwa nzambi pa buloba. Ûvwa mwa kwakula, ne bìvwa mwa kwikala nanku.

Ûvwa mwa kwamba *cikampanda*, ne bivwa mwa kwikala nanku. Kaa! S'ki Yèyè awu, Nzambi, Yehowah, Yèyè uvwakù mu diikalaku dya nkàâyendè awu, kadi patùdi twakulangana apa Yèyè ùdikù pamwe ne dîkù Dyèndè, ne bânà Bèndè pamwe Nende. Ki bwalu mbwòbù abu.

¹⁰¹ Mpindyewu, nwâbalaayi aci. Netubwelemu mu diisâtù diloolo, patwàpetà dîbà dyàbûngî. Tucidi anu ne tukwabo tusunsa tutwè ku dikumi ne tutaanu nenku netwîkalè mwa. . . Mèmè mvwa ndyambidila ne nêmfikèku ku kaaba kampanda mwab'ewu, kadi katwakufikaku to, kutùdi batwibwe citampi kùdi Nyuma Mwîmpè wa mulayi aku. Eyo.

¹⁰² Mpindyewu, ndîbà kaayi ditwàkabîikidiibwà bwa kwikala basadidi bàà Nzambi? Ndîbà kaayi dyàkabîikidiibwà Orman Neville bwa kwikalaye musadidi wa Nzambi? Kaa, ekelekele! Eci's cidi cînkèmesha's. Nènnwâmbilè, twânjàayi kwangataku ndambu wa Mifundu. Ndi muswe bwa nwangate Peetèlò wa Kumpala 1.20. Nenku, wèwè Pat, angataku Bwàkabuulwibwà 17.8. Ne mèmè nèngàngatè Bwàkabuulwibwà 13. Mpindyewu tudi baswe kuteeleja kaaba aka, pawikalà muswe kumanya ne ndîbà kaayi dyàkakubiikilà Nzambi bwa wèwè kwikala mwena Kilisto. Kaa, ndi munange eci. Cya ne: "Muntu kaakwikala ne mwoyi anu ku dyâmpà nkàâyaadi to, kadi ku Diyì dyònsò didi dipátukà mukana mwa Nzambi." Eyo, Mwaneetu Neville, wâpeci Peetèlò wa Kumpala 1.20. [Mwaneetu Neville ùdi wàmba ne: "1.20."—Muf.] Ee, balàaku 1.19 ne 1.20. Tèèlejàayi eci. ["1.19 ne 20."] Eyowa.

[Kadi ne mashi a mushinga mukole a Kilisto, bu a mwânà wa mukooko udi kàyi kalèma ne kàyi katobà,]

[Ûvwa bulelela mudyànjlila kulongolola kumpala kwa difuka dya dyulu ne buloba, kadi wâkamwèneshiibwa bwenu nwênù mu bikondo bya ndekeelu ebi awu.]

¹⁰³ Ndîbà kaayi dyàkadyànjlilàYe kulongolodiibwa? Kumpala kwa difuka dya dyulu ne buloba. Mwaneetu Pat, mbadîlaaku wèwè Bwàkabuulwibwà 17.8.

[Nyama ùdi umona awu ùvwakù, ne kènàku; ne neapatuke mu ciina cidi kaciyi ne ndekeelu, ne neaye mu dibutuka; ne aba bàdi basòmbèle pa buloba nebakeme, aba beena mènà àvwà kaayi mafunda mu mukanda wà mwoyi kacya ku difuka dya dyulu ne buloba, pàdîbo bàtàngila nyama uvwaku, ne udi kàyikù, ne mucikàlekù awu.]

¹⁰⁴ Wâseeswishiibwa nganyi? Wâseeswishiibwa kùdi muntu wa maalu a ntendeleelu bu mùvwà Shawùlà awu nganyi? Ûvwa wa budimu bukole ne bupwàngàne mu mushindu wà bifwànyine kuseeswisha banganyi? Bas- . . .mene [Disangisha didi dyàmba ne: "Basungula."—Muf.] bu ne bivwa. . . ["mwa kwenzeka."] bu

ne bivwa mwa kwenzeka. Eyo, Bwàkabuulwibwà 13.8, lekèlaayi mèmè nñubadilèci:

Ne aba bõnsò bàdì basòmbèle pa buloba neba- . . . aba bõnsò bàdì basòmbèle pa buloba nebamukuukwile, aba beena mènà àvwà kaayi mafundiibwe mu mukanda wa mwoyi wà Mwânà wa mukooko mushebeya kumpala kwa difuka dya dyulu ne buloba.

¹⁰⁵ Ndìbà kaayi òvwà mènà etu mafundiibwe mu Mukanda wa Mwoyi wà Mwânà wa mukooko? Pààkashebeyiibwà Mwânà wa mukooko kumpala kwa difuka dya dyulu ne buloba. Pàvwà Nzambi mwikàle Yehowah, El, Elah, Elohim apu, Ewu udikù nkàayendè awu. Anu bu dibwe dimwepele dinene dya Mbongò, ne Yèyè kàyi mwa kwikala cìngà cintu to, kadi munda mwa diine dibwe dya Mbongo edi byambiibwà Byèndè bivwa Musungidi. Mu byòbì byambiibwà ebi, munda Mwèndè Yèyè amu, mívwa Mwendopi. Ee, kakúvwa cintu nansha cimwe cya kusungila ne cintu nansha cimwe cya kwondopa to, kadi byambiibwà Byèndè kucipatulabi. Pa nanku, dìbà adi kumpala kwa difuka dya dyulu ne buloba, piine pààkamanyàYe, mu dileeja dinene dya patooke munda Mwèndè emu ne, Yèyè neikalè Musungidi, bwa ne Yèyè nealwe ne neavwijiibwe mubidi ne neasombe munkaci mwetu, ne kumanyaYe ne ku mibùndàbùndà Yèndè netwondopiibwe, ki kushebeyaYe Mwânà wa mukooko mu Mukanda Wèndè awu kumpala kwa difuka dya dyulu ne buloba, ne kufundaYe dìnà dyebe mu wòwò Mukanda awu kumpala kwa difuka dya dyulu ne buloba. Kaa!

¹⁰⁶ Tèèlejàayi Eci! Didyànjila-kulongolola didi ditùma mèsù paanyima ku didyànjila-kumanya, cìndì nswa kwamba ndisungudiibwa. Disungudiibwa didi ditùma mèsù paanyima ku didyànjila-kumanya, ne didyànjila-kulongolola dyòdì didi ditùma mèsù ku bukole-bukontononyi bwa maalu. Kanupu mwoyi aci to, cya ne disungudiibwa adi didi ditùma mèsù paanyima apa, ki cyòcì eci: “Mèmè ewu mvwa mpoopu. Ndi mulela mu mpekaatu, mufwimba mu bubu, mulwe pa buloba mwikàle ngamba mashimi, mulela munkaci mwa bangènzàmpèkààtù. Tààtù ne mààmù ne famiye wanyì yònsò mujimà, bangènzàmpèkààtù. Mèmè ewu mvwa mpoopu. Kadi, anu dyakamwe nunku, mèmè kulwa lutete lwà blé. Mbyenzeke munyi?” Aci, ncinyi ciine aci? Disungudiibwa. Nzambi, kumpala kwa difuka dya dyulu ne buloba, wàkasungula ne bivwa bikèngela bwa mpoopu kulwaye lutete lwà blé. “Mpindyewu ndi mumanye ne ndi lutete lwà blé, bwalu ndi musungidiibwe. Ndi ncyenza bishi?” Ntùma mèsù paanyima mmona ne Yèyè ngukààvwa mudyànjile kucilongolola, kùkaadi ntanta mule. Ku didyànjila-kumanya Yèyè wàkamòna ne mèmè nèmMunangè, ki kwenzelaYe difuta dya cibawu ku Mwan’Èndè Sungasunga, bwa ku Yèyè awu mèmè ngaamona mwa kuumuka ku mpoopu kulwa lutete lwà blé. “Mpindyewu, ndi penyi mpindyewu?”

Ndi musungidiibwe, ndi ngendela mu ngâsà wa Nzambi. “Didyànjila-kulongolola didi ditàngila ku cinyi?” Ku bukolebukontononyi bwa maalu. “Yèyè neaye naanyi too ne penyì, ne kúnyaaya kwine nkwèpi?” Amen. Aci kaayi cyànùfikì. Ki bwalu mbwòbù abu’s.

107 Mpindyewu twánjàayi kubala tuya kule ndambu, ne pashiishe nebigengele bwa twètù kwimanyika mu katanci kakeke menemene.

Bilondèshile mùdiye . . . mutusungule munda mwèndè kumpala kwa difuka dya dyulu ne buloba, bwa twètù kwikala bansantu . . . katùyi ne cya ditubanda naaci kumpala kwèndè mu dinanga,

Mudyànjile kutulongolola ku diteekiibwa, mudyànjile kutulongolola ku diteekiibwa dya bânà ku Yesu Kilisto kùdiye yèyè mwine, bilondèshile disanka dya diswa dyèndè,

108 CyàkenzàYe ncinganyi? Yèyè, ku didyànjila-kumanya, wàkadyànjila kutumona, mumanye ne Yèyè úvwa Musungidi, diikalaku dya nkàayèndè. Kakùvwakù nî m’Banjelo, nî ncinyi nansha cimwe to; anu Nzambi, Elah, Elohim, Ewu udi wikalaku nkàayèndè awu, kakùyikù cintu to anu Yèyè nkàayèndè. Kadi mu Yèyè amu mùvwa Musungidi. Ee, cyàsungilàYe ki cinganyi, pàakù nyawu kakùvwa cintu nansha cimwe cijimine? Mumanye aci, nenku Yèyè úvwa mumanye ne cyambiibwà cinèndè cívwa mu Yèyè eci necyènzè ndongamu wa cintu kampanda kuntu kwàka cívwaYe mwa kusungila. Dìbà adi pàvwàci cyènza nanku, ku didyànjila-kumanya Yèyè úvwa útàngila panshi Ùmòna bònsò bààCìitabà abu. Ne dìbà adi pa kwenza nanku, Yèyè úvwa wàmba ne: “Bwa kusungila cyòci aci, mushindu wumwepele wùNdi mwa kucyenza, newikalè wa Mèmè mwine ntuuluka panshi ne mwijiibwa mubidi ne ngangata mpekaatu wa muntu pambidi Pàanyi, ne mmufwila yèyè, bwa Ngaamona mwa kwikala Ewu udibo bàkuukwila,” bwalu Yèyè ùdi Nzambi, cintu cya dikuukwila.

109 Dìbà adi kutuulukaYe ne kudyangacilaYe bwalu abu pambidi. Ne pàvwàYe wènza nanku apu, Wàkenza aci bwa Wàmòna mwa kukusungila wèwè udi ujinga kusungidiibwa awu. Nudi bamone cìndì njinga kwamba aci anyi? Ku didyànjila-kumanya, Nzambi udi kàyi mikàlu, Úvwa mumanye bintu byònsò awu, wàkamòna Mwànà wa mukooko awu, ne Wàkashébeya Mwànà wa mukooko awu kumpala kwa difuka dya dyulu ne buloba, ne Wàkafùnda dìnà dyebe mu Mukanda wà Mwoyi wà Mwànà wa mukooko. Nenku Yèyè wàkamòna diseeswishangana dya Sataana, cívwaYe mwa kwenza aci. Pa nanku ki kufundaYemu dìnà dyebe. Ne kwambaYe ne mufwilakanyi ne Kilisto neikalè mutendeledi wa dikema, mwìmpè wa dikema, mulumyana wa maalu mìmpè wa dikema, muntu wa meeji matwe wa dikema, mutendeledi wa dikema,

mu mushindu wà mufwànyine kuseeswisha ne Basungula mene bu ne bivwa mwa kwenzeka. Kadi ncintu cya kaciyikù mwa kwenzeka to, bwalu mènà abo àkaadi madyànjila kulongolola kumpala kwa difuka dya dyulu ne buloba. Ku disungula nkwakabàsungulàYe, ne ku didyànjila-kulongolodiibwa bôbô mbamanye kùyaayàbo. Ki bwalu mbwôbù abu's.

¹¹⁰ Mpindyewu, udi mufwànyine kwela aci mpatà ki nganyi? Aci ncidi Pôlò mwambe. Ki Mufundu wà Pôlò ngwôwò awu. Ki cidi Pôlò mufunde ncyôci aci. Ki cyàkalongeshàye ekeleeziya wendè ncyôci aci. Ekeleeziya, bilondèshile myaba, kumpala kwa difuka dya dyulu ne buloba. Pàvwà Nzambi, mu bisaamà Byèndè bya pa kulela, mwikàle munkaci mwa kulela, munkaci mwa kukulela wèwè awu, mumanye ciwènzà, bilondèshile myaba Yèyè wàkakutèèka mu Mubidi Wèndè Yèyè mwine, bwa wèwè kwikala mukaji wa nzubu, bwa wèwè kwikala cidimè, bwa wèwè kwikala muyiishi, bwa wèwè kwikala muprofa, bwa wèwè kwikala *cikampanda* anyi kwikala *cikansanga*. Wàkakutèèka bilondèshile myaba. Pashiishe patùkaadi bamanè kuumuka mu malaba a matungulu a ayi a Ejiipitu apa, ku dijidiibwa, ne babàtùjiiibwe mu buloba bulaya abu... Bwalu, mulayi wa Nzambi n'Nyuma Mwîmpè. Efeso 4.30, ùdi wàmba ne: “Kanubungamiji Nyuma Mwîmpè wa Nzambi unùdi batwibwe citampi too ne ku dituku dya bupikudi bwenu.” Dìbà adi Nzambi, mumane kudyànjila kulongolola ekeleeziya, Wàkamba ne: “Nenku bisàmbà byònsò, nemwikalè bantu miliyò kuvudija ku miliyò biikalà mwa kwenda lwendu lwà butendeleedi anu lwetu lwà menemene elu kadi bàaseswishiibwà.” Bààbèngà kuseeswishiibwa nebiikalè anu aba bàdi basabùke babwelè mu buloba bulaya, beena mènà àkafùndiibwà kumpala kwa difuka dya dyulu ne buloba mu Mukanda wà Mwoyi wà Mwànà wa mukooko, ne basabùke babwelè mu buloba bulaya, ne biikalè bàbùsànkila.

¹¹¹ Bantu bààbùngi bàdi bàciina ne nkwepi kwàvwàbo bàkaadi bènza maalu a lukutukutu. Bantu bààbùngi bàdi bàciina ne nkwepi kwàvwà Nyuma Mwîmpè kubenzeja cintu kampanda cya bôbô—bôbô bàkaadi bumvwa bundu bwa bantu. Bantu bààbùngi bàdi bàciina ne nkwepi kwàvwàbo bàkaadi bàdila myadi, ne bananga bààbô bàbàmòna bàdila myadi, anyi baamamwàbò, anyi mwena mutumba naabo, anyi mfumwabo wa mudimu mufwànyine kubamona.

¹¹² Lekelaayi nnulondeleku bwa muntu musangu kampanda, kumpala kwa mèmè kujikija. Kùvwa muntu kampanda dyèndè Davidi, nenku pàvwà musheete wa cipungidi wà Nzambi musanganyiiibwe mu ditunga dya beena Peleshete, ne mulwe dyamunu, wènda wùkòkiibwa kùdi musheete wa cipungidi, ngombe mukole nguvwa wenda ubikòka, pàakamònà Davidi musheete awu wènda wùlwa, ùvwa musenye kaacilàmbà kakese kampanda, kupatukaye lubilu kwàka, kuyaye wènda ùsempela,

ne ùtùpika wènda ùnyùnguluka, ne wèla mbila mikole ne ùtùpika, ne kumengaye maja ne kutupikaye ne dimenga dya maja. Wa bwalu, yèyè, mfumu mujimà wa Izaleela's! Ki mukajèndè pàakatàngidilàye pa didìdiishi ne kumumonaye wènza bintu bya lukutukutu abi, kumudyombolaye. Mona's, mukaji awu's ùvwa mwa kwikala mwambe ne: "Cidingidingi naanyi we! Mona's kwàka, mushindu wùdiye wènza maalu, wènda ùsempela, ne ùtùpika wènda ùnyùnguluka ne wènza maalu mushindu wàwa. Mona's, yèyè's ùdi ne cya kwikala ne katombòtombò!" Nenku diloolo adi pàakaalukilàye kumbelu, mukaji awu kwambaye, mu mèyi a mushindu ewu: "Mona's, wèwè's udi mumfwishe bundù be. Mona's, wèwè ewu, mfumu mujimà, bàyaanyi wanyi mèmè, pambelu pàapa wenza mushindu awu, wenza mushindu awu!"

113 Davidi kwambaye ne: "Maalaba's nêngènzè bipite apu. Eyowa's mukalenge!" Kwambaye ne: "Kwènàku mumanye ne kumpala kwa Mukalenge nkùmvwà njà aku to?" Ùvwa musabùke muye dyàmwàmwa's! Yèyè's ùvwa ùsanganyiibwa mu buloba bwa mulayi. Ùkaavwa mujimije byònsò bya ménà madyàngacila ne bitoci bya pa buloba abi. Ùvwa ne disanka dyàbùngi dya kumanya ne musheete wà cipungidi wùkaavwa wùbwela mu nsesa yèndè yèyè mwine.

114 Nenku, kaa, nyawu nnwambila's, bamwe bantu bàtu ne bwòwà bwa kupeta Nyuma Mwimpè, ne bwòwà bwa ne nkwèpi kwikalàbo bafwànyine kwakula mu myakulu. Bàdi ne bwòwà bwa ne nkwèpi kwàlwà muntu kampanda mufwànyine kwamba ne: "Mpindyewu, yèyè ùkaadi umwe wa ku balumyana baakudi bàà mu myakulu abu." Bàdi ne bwòwà bwa kulwa mu ekeleeziya bwa kubatijiibwabo mu Dîna dya Yesu Kilisto, bwalu bàdi bàCyumvwa bundu. Uh! Kaa!

115 Muntu mukwabo ùvwa wàmba ne bìvwa bikèngela bwa mèmè kuumusha mikaba yànyi ya mèyi mu cyalu, ne bwalu nyawu mvwa muyiishe pa kubatijiibwa kwa mu Dîna dya Yesu Kilisto. Ncyakuyumushaku to. Nêngènzè mikwabo yàbùngi! Aci ncy bushuwa, cya ne, kwenza mikwabo yàbùngi! Aci's ki Bible. Bòbò kabàyi baswe citùvwà benze makeelela to, bàtangilè anu cyanààna kadi bàmonè citwènza maalaba! Ki cintu cya dyenza ncyôci aci, nwamonu's, kutungunuka anu ne diya. Kakwena ndekeelu ku cyôci aci nansha, bwalu ncyà kùdi Mukalenge. N'Nzambi.

116 Nudi bamanye cyàkenzà Nzambi? Nzambi kupwekesha anu mèsù ùtàngidila mu Dyulu, kwambaYe ne: "Davidi, wèwè kadi ki muntu wa pa mwoyi Wànyi Mèmè mwine." Davidi kàakafwà bundu to. Yèyè ùvwa musadidi wa Mukalenge. Ùvwa munange Mukalenge. Ne ùvwa ne disanka dyàbùngi, disanka dya diyiila ne panshi, mu mushindu wà kàyikù mwa kutuma meeji ku kaneemu kàà kùdi bantu aku to.

117 Nudi numona's, mûngãmbì mu diyiiisha dyànyì mu dinda emu amu, twètù tutu tukwàcika bwòwà bwàbúngì be, mu mushindu wa ne, tutu baswe bwa Shawùlà kampanda atulongeshe yèyè, tutu baswe bwa Shawùlà udi mupatukile mu seminere kampanda awu àtwãmbilè yèyè mutùdì ne cya kwikala twenza ntendeleelu wetù ne mutùdì ne cya kubyenza. Abi's bìdì dîshiyà dya Yadènè. Dya muneemu edi, Nyuma Mwímpè ngudi ulombola. Dya muneemu emu udi pambelu pàà bitoci abi. Dya muneemu emu wèwè kwèna utanga bidìbo bôbò beela meeji abi to. Dya muneemu emu udi mufwe, ne mwoyi wèbè mmusokoka mu Kilisto kupicila ku...ne mutwibwe citampi kùdì Nyuma Mwímpè. Kwèna ubitanga to. Ukàadi musòmbèle mu Kaanààna. Udi mwa kutwala blé mwímpè awu. Udi cifukiibwa cipyacipyà mu Kilisto Yesu. Udi mu lwendu mutangile ku buloba bulaya.

118 Ndi mvuluka pãmvwà mwimane kuntu kwàka, Mwaneetu Collins, kùkaadi bidimu bitwe ku makumi asatu ne bisatu, pãvwà ekeleeziya ewu kàyì mwanjì kwibakiibwa to. Cìvwà nkaadisangisha kakese kàà mu ntenta kiikàle kàsanganyiibwa mwaba ewu mu ditumba emu, disangisha dyànyì dya nzànzànà. Mvwa nyiisha Evanjeeliyo umwèumwè ewu, cintu cimwecimwe eci, mabanji a Kilisto àdì kaàyì kwondola kumana: dibatiiza dya mu màyi mu Dìnà dya Yesu Kilisto, kwitabuuja ne Dìyì ne Dìyì dyònsò ne dìdì Bulelela, dibatiiza dya Nyuma Mwímpè, dyondopa dya kùdì Nzambi, makole a Nzambi, anu múnđì mBiyiisha mpindyewu emu, kacya nciyikù museesuke ku kantu nansha kamwe kààCì to. Nzambi mmuCimbuulwile kabidi kupita, pa nanku, anu mùdìYe ùCìbuulula emu, pàànyì ntũngunuka anu ne kuCitwala. Kacya Yèyè kàtukù ùmushila kantu ku cikaadiku to, Yèyè mmutungunuke anu ne kuKùsàkidila bikwabo.

119 Mvwa mwimane kuntwaku pãvwà bantu batwè ku nkama yitaanu biimàne ku mwelelu wà musulu aku, bìmba ne: “Ndi mwimane ku mwelelu wà Yadènè kùdì bipeepele bikole bituuta, ne ntàpa dísù dya majiyà, ku buloba bulenga kumona ne bwa disanka bwa Kaanààna, kùdì bintu byànyì bìsanganyiibwa. Ndìbà kaayi dīngààyàku kwobeka ku mwelelu wà bukole bwa mubidi awu ne kwikalaku mubeneshiibwe kashidi, ndìbà kaayi dīngààyàku kwobeka mu...kwa Taatù wanyi ne kwikishilamu kashidi?” Pààkabangàbo anu kwimba nanku, mvwa ngangata mwànà wa balume kampanda mmwinyija mu musulu amu bwa kumubatiizamu mu Dìnà dya Mukalenge Yesu. Mémè kwamba ne: “Taatù wa mu Dyulu, pàndì ndwa ne mwànà wa balume ewu Kùdì mwimanyine pa ditonda dyèndè apa...” Mémè mwine, mucikàle anu mwànà's, ndi ne maafòtò a ciine aci kumbelu. Mémè kwamba ne: “Pàngaàmubàtiizà mémè mu màyi, Mukalenge, mwimanyine pa ditonda dyèndè, mu Dìnà dya Yesu Kilisto Mwànà wa Nzambi, Wèwè umuujeku tente ne Nyuma Mwímpè.” Nenku lwà pa dyòdì dìbà adi ki Cintu kampanda kupatulaCì mvunda, ne ki Cyòci cidì cipwekà bu mvunda eci,

Mutooto wà mu Dinda Wùdì wùbàlakanà awu kwimanaWu mwaba awu. Ki kwimanaku Bukênkè bunùdi numona mu fòtò wàwa bwàbwa. Ki kwimanaBu mwaba awu.

¹²⁰ M'Buyààyààye buloba bujimà, mu Canada mwàmwa too ne mu nyungulukilu mwônso. Bàakamba ne: “Bukênkè bùdi kabùyì bùùmvwika mbumweneke kumutu kwa mwambi wa pa kaaba wa ba-Baptistes munkaci mwa kubatiiza.”

¹²¹ Kùkaadi ndambu wa matuku, pàakalwà Docteur Lamsa kùndì, ne kacya kàyikù mumanye kantu nansha kamwe pa bwalu abu to, ne kuntwadilaye fòtò, udi mwaneetu awu nende mwaba wàwa patùdì twakulangana apa. Udi ne mwine fòtò awu anyi? Udi ne Bible awu mwaba wùdì awu, mutèeka mwaba awu, ùdi mu mukanda wèbè anyi? Eyo. Kùvwa fòtò wa cimanyinu cya Nzambi cya kalekale cya beena Ebelu, anu menemene cyòcì cìvwà ciikàlekù mu matuku a Yobo aci, kumpala mene kwa Bible kufundiibwaye. Nzambi mu byambiibwà Byèndè bisatu, kaciyi nzambi yisatu to. Nzambi umwepele mu byambiibwà bisatu: Taatù, Mwànà, ne Nyuma Mwímpè, midimu yisatu mùdì Nzambi mukwacile mudimu. Kaciyi nzambi yisatu to, byambiibwà bisatu! S'ki Cyòcì cìvwà mwaba awu aci. Muntu munene awu, Docteur Lamsa, nkudimwinu wa Bible wa Lamsa, pàakambàye mu dinda adi. . .Pàngàakamwambilà cyòcì aci, mèmè kwamba—mèmè kwamba ne: “Ncimanyinu kaayi aci?”

¹²² Yèyè kwamba ne: “Ncimanyinu cya kale cya Nzambi, mu cyena Ebelu. Nzambi, Nzambi umwepele mu byambiibwà bisatu.”

Mèmè ne: “Bu mùdì Taatù, Mwànà, ne Nyuma Mwímpè anyi?”

¹²³ Kwimanaye, ne kwanjiye kuteeka dikopo dyèndè dya kàfè pa meesa, kuntangilaye. Gene, ngeela meeji ne wèwè uwwapù, Leo. Kwambaye ne: “Udi witabuuja aci?”

Mèmè ne: “Ne mwoyi wànyì wónso.”

¹²⁴ Yèyè ne: “Makeelela diloolo awu, pâmvwà mwimane mu disangisha dyebe apu, Mwaneetu Branham, mèmè kumona dijingulula adi. Kacya ncitu mwanji kudimonaku kwónso eku mu Àmerike emu to, mu ditunga dyànyì emu.” Yèyè ne: “Bantu bàà beena Àmerike aba kabàtu mene bamanyèku Bible to. Cintu cimwepele cidìbo bôbò bamanye cidi anu dingumba dyabo. Kì mbamanyeku nansha mwaba mwine wùdìbo biimànyine to.” Yèyè ne: “Kabeena ne cidìbo bamanyè to nansha cimwe.” Yèyè ne: “Kadi pâmvwà mwimane mwaba awu makeelela diloolo,” yèyè ne, “mèmè kwamba ne. . .” Mpindyewu, Mwaneetu Gene, ndi ngamba eci anu ne kaneemu kàà menemene ne dinanga ne bikwabo. Yèyè ne: “Mèmè kwamba ne: ‘Wàwa ùdi ne cya kwikala muprofeta.’ Kadi pândì mmona wèwè mwitabuuje ne Taatù, Mwànà ne Nyuma Mwímpè kì nanzambi yisatu to, ne mbyambiibwà, dìbà adi ngàamanyì ne wèwè udi muprofeta wa

Nzambi, bwa cyanàànà kacìvwaku mwa kwikala cikubuulwila mushindu awu nansha.” Yèyè ne: “Aci’s kadi ki cimanyinu cipwàngàne.” Yèyè ne: “Kacya mèmè ncìtukù...” Yèyè ne: “Wèwè ewu kwèna Unitaire to?”

125 Mèmè ne: “Bwàlà, mukalenge. Mèmè ncyèna Unitaire to. Ndi mèmè ngiitabuuja ne Nzambi ùdi Nzambi wa Bukole bwònsò, ne byambiibwà bisatu abi bìdì anu mmidimu yisatu cyanàànà mwàkasòmbelà Nzambi umwepele awu.”

126 Yèyè ne: “Mwoyi wèbè wùbeneshiibwè!” Yèyè ne: “Dìngà dituku wadyàkwela mashi ebe panshi bwa cyòcì aci, kadi,” yèyè ne, “baprofeta bàtu misangu yònsò anu bàfwila kiipacila kaabo.”

127 Ki mèmè kwamba ne: “Bìikalè nanku, pìikalàcì cìsànkisha Mukalenge wanyì.” Nkudimwinu wa Bible wa Lamsa.

128 Kaa, ncilelela anu cya menemene’s. Mmisangu bùngì kaayi, mùndì ngambila ekeleeziya ewu, bu mwàkambà Samwèlè kumpala kwa kusungulabo Shawùlà ne: “Kumpala kwa wèwè kuya kashààla wa mu dingumba kampanda mpindyewu, ne kulekela bàkuswika wèwè yònsò mu ntendelelu wa mushindu kampanda, bwa cinyi kùyikù ulekela Nyuma Mwimpè ùkulombola?” Bwa cinyi kùyikù wangata Nzambi bu Mulombodi wèbè ne kuMulekela ùkubènesha, bwa kupwa mwoyi bya dingumba dyebe adi abi? Mpindyewu, ncyèna ngamba ne kwikadi wa dingumba dya ekeleeziya nansha dimwe to, ikàlà wa mu dyònsò dyùdì muswe adi. Aci’s ncikutangile anu wèwè. Kadi mèmè ndi nkwambila, wèwè bu muntu-nkààyà ne, lekela Nyuma Mwimpè akulombole. Bala Bible. Ne cidi Bible wàmba bwa kwenza aci, ùcyènzè. Nzambi anubeneshe.

129 Nenku mpindyewu ngìndìdì ntanta mule be. Ndi ndikonka ní kùdikù bantu mwaba ewu bàdì baswe kulwa mu mulongo wà babeedi bwa kubasambidila. Bòbokù, bèlè byanza muulu. Anu umwe, babidi, basatu. Eyo. Nenku nwènù bònsò vwilàayi kuneeku nwimane kaaba aka panwikalà baswè, pa dîbà edi, nenku—nenku netwènzè disambila. Nenku pashiishe netwikalè. . . Ncyèna muswe bwa nwènù kwanji kuumuka to. Ndi muswe bwa kwenza ckwabo cintu kaaba aka kumpala kwa bantu bònsò kumpala kwa twètù—kwa twètù kujikija.

130 Mbanganyi bàdìku banangè dilonga dya Mukanda wa Galàtiyà. . . kaa, ndi njinga kwamba Efeso? Mpindyewu, mu diisàtù diloolo, netubwele mu Citampi aci. Nenku pashiishe mu dyalumingu dilwalwà mu dinda, netubwele mu dishikikiibwa dya ekeleeziya bilondèshìle myaba. Kaa, bu ne. . . pàmwàpa netubwelele mu cyòcì aci, mu diisàtù dilwalwà edi diloolo, bwenu nwènù beena mu Jeff emu abu. Dishikikiibwa dya ekeleeziya bilondèshìle myaba yìdìbo ne cya kwikala, muntu ne muntu. Mushindu wutùdì babìikidiibwe ku diteekiibwa. Nzambi mmututeeke bu bànà, tudi bànà ku dilediibwa. Batèekiibwe

ne bashikikiibwe kùdì Nyuma Mwîmpè bilondèshile myaba. Tàngilàayi! Bôbò bônsò muntu ne muntu bāvwa beena Ebelu, pàakasabukàbo musulu awu apu, kadi Yoshùwà wàkaabanya buloba abu ne wàkapèèsha muntu ne muntu bwèndè buloba bilondèshile dīyi dyàkapàtulà mamwèndè ku dilediibwa dyèndè, mwaba wùvwà Nyuma Mwîmpè mwambile mamwèndè awu.

131 Tàngilàayi numone Yakobo pàkaavwàye ùfwa, muprofeta awu, mufofomija, kukòkelayè makàsà èndè pa bulaalu, kwambaye ne: “Vwilàayi mwab’ewu nwènù bânà bàà Yakobo bwa nnwāmbilè kunwikalà mu dituku dya ndekeelu.” Butumbi’s we! Kaa, ndi mumanye ne ndi mwa kumweka muntu udi kàyì ùmvwika to. Bantu’s bàdi mwa kumweka bàà kabàyi bumvwika. Kadi, kaa, wèwè wikalapù mumanye di—ditwishiibwa’s we, di—dìlakuka dya kapyà mu mwoyi! “Vwilàayi mwab’ewu bwa nnwāmbilè kunwikalà mu matuku a ndekeelu.” Nenku mèmè ndi mwa kwangata Mufundu anu wòwò wumwewumwe awu, ne kwangata karta kàà mwaba wùdì beena Yuda bàsanganyibwa lelu ewu ne kunujaadikila ne bàdi bàsanganyibwa menemene anu mu kaaba kamwekamwe kàakambà Yakobo ne nebasanganyibwe mu dituku dya ndekeelu aku. Ne kacya bôbò, mwômò amu, kabāvwakù basanganyibwe kaaba aku to anu too ne pàalubò kwalukila kubangila mu matuku mwandamutekete a ngondo mwitànù, wa cidimu cya 1946, diloolo dyàkammwènekèlè Mwanjelo wa Mukalenge kuntu kwàka adi ne kwambaYe bwa mudimu muntuma naawu. Nenku ndi mwa kunuleeja ne, pàakaalukilàbo mu buloba bupyabupyà amu, bàakatwà makàsà anu mu myaba menemene yàkambà Yakobo ne nebàsombelèmu ayi. Nenku’s ki bôbò abu basòmbèlemù lelu ewu. Kaa, kaa, ekelekele, kaa, ekelekele! Twètù’s tukàadi baseemène mu ntanta wa dituku dijimà ne Kwetu, ki cyònsò cìdiku.

132 Nwènù bananga bàanyi, nudi nusaama, bwa cyanààna kanùvwakù bafwànyine kwikala biimane mwab’awu anu bwa kwimana to. Mèmè ndi mwaneenu. Ndi ne mudimu muntuma naawu kùdì Nzambi bwa kusambidila babeedi. Kaciyi bu wanyi. . . bu ne ndi ne bukole bwa dyondopangana naabu to, to. Kadi ndi ne bukole bwa disambila. Anu mungāmbi mu dinda emu ne, Davìdì kāvwa ne cintu nansha cimwe to anu ndundu wa nyuunyi mukese, kadi yèyè wākamba ne: “Ndi mumanye cyènzāye ne bukole bwa Nzambi bùdipu abu.” Nwamonu anyi? Ndi mèmè anu ne kaadisambila kakese cyanààna kàà kunwenzela, ne byanza byanyi bwa kunutentekelabi, kadi ndi mumanye cìdì diitabuuja mu Nzambi mwa kwenza. Dikaadikù dicyènzène bwa bakwabo, nedicyènzè bwenu nwènù. Itabuujaayi cyòcì aci mpindyewu panùdì nwenda nubànda apu, anu pabwìpì menemene ne mwaba mwine ewu.

133 Mpindyewu, ndi ndikonka’s, bwa kuvwija cyòcì eci cya cìkwàta mudimu bilenga, ní ncyèna mufwànyinekù

kulomba bwa mwaneetu wa balume kulwaye mwab'ewu bwa kubalaabaku maanyi. Udiku mwa kwenza aci anyi, Mwaneetu Neville? Nêndombê ekeleeziya ní nudiku mwa kwinyika mitu yenu mu disambila.

¹³⁴ Mpindyewu vùlukàayi ne, lumingu lushààle pâmvwà ne ku mwoyi kùngenda bikole bwa bwanga bwa misanda bwa mafuta abu, mvwa mufwànyine anu kwikala mufile ní ncinyi cyònsò bu muntu mulweku kuntentekela byanza kwànyì kumpbelu. Bu ne mvwaku anu mupete muntu mulwe kwànyì kumbelu, udi Nzambi mubeneshe ne mwambulwishe, nunku mêmè's ndi mucyànyishe bikole. Nwênù bònsò nudi badyũmvwè mpindyewu mûmvwà mêmè mudyũmvwè dîbà adi amu. Nudi badyũmvwè mpindyewu ne nudi baswe bwa mêmè kwenza anu nememene mûmvwà muswe bwa muntu kampanda kungenzelaye diine dîbà adi amu. Nzambi kùitabikù to bwa mêmè kwepela mudimu awu. Mêmè misangu yònsò, nansha mêmè mucyoke, nansha mêmè muzengèle, mu mushindu wa mupange ne mwa kwambula dikàsà dimwe, nye anu kuya, bwalu ngaadyàkutwilangana cyakabidi ne yònsò wa kunùdi, mu Buloba bwa dyàmwàmwa bwàbwa.

¹³⁵ Dîbà adi nwênù bakaji banunu, balume banunu, bacibùlùke, ne nsuki ya mvyà ne munkaci mwa kutuuka, nwenda nupoopoka mùdi cilóngò cya rose cidi cibaalùle kaalutóngà kàaci kakese aku, kàmacisha tubeji twàkù atu ne kènda kàteketangana, s'nudi nwenda nupoopoka's, kî mmwòmò anyi? Ncya bushuwa. Anu . . . Kadi cintu cimwepele cinùdi baswe kushàadila pamwe cidi anu bwa kukenka bwa butumbi bwa Nzambi. Pa nanku pàdi mwena lukuna munwîbè mpindyewu kadi kupatuka lubilu kuya, mêmè ndi ndwa ne ndundu wa nyuunyi wa Nzambi, mwikàle ne diitabuuja, ne dipà didi Nzambi mumpeeshe edi. Cîmvwà mwambe ncyòci eci, bwa nwamona mwa kucyumvwa. Mvwa mwambe ne: "Bu Peetèlò mwa kubwela anu cyanàànà, anyi bamwe bàà kùdîbo." Kwàmbi wèwè nanku to. Kabyena bikèngela bwa wèwè kunsambidila to. Ubwela anu mushindu ewu, wamba ne, bu cilejilu wambila mukaji ewu, wamba ne: "Wèwè ki Mwaneetu wa bakaji *Kampanda* anyi?" Dyebe nganyi? Mwaneetu wa bakaji Howard. Wamba ne: "Wèwè udi Mwaneetu wa bakaji Howard. Udi mwena kwitabuuja anyi, Mwaneetu wa bakaji Howard? Itabuuja. Udi mwena kwitabuuja. Nanku, udi umona's, wèwè udi ne bukenji ku mabenesha ònsò a bupikudi." Dîbà adi ndi mufwànyine kwamba ne: "Mwaneetu wa bakaji Howard, byònsò nebyakane," ne ngumuka nya. Kaa, mushindu mwine . . . Mêmè kwamba ne: "S'ndi mufwànyine kusàma's, s'ndi mufwànyine kwela mbila." Ndi mufwànyine kwamba ne: "Mukalenge, bìdi anu ne cya kwenzeka. Bìdi anu ne cya kwenzeka."

¹³⁶ Ki mêmè kudyambidila ne: "Ee, bantu's bàdi bàdyàmbidila cintu cimwecimwe aci pàndi ndwa bwa kubasambidila." Pa

nanku ki cìdì cyènza ncyôci aci. Nudi numona cîndi njinga kwamba aci anyi?

137 Kadi nkààdikù mwimànèèmàne, misangu yàbùngì, mukwate bantu, ngamba ne: “Kaa, mwaneetu wa bakaji wa mushinga mukole, udiku muswe kuCiitabuuja anyi? Kaa, udiku muswe kuCiitabuuja anyi?” “Mukalenge, Èyi Nzambi, bàfikishèku ku diCiitabuuja. Enzaku bwa bàCitàbùùjè.” “Kaa, bu wèwè mwa kuswa, udiku mwa kuswa bwa kuCiitaba mpindyewu anyi?” Kí nnanku to. Aci nkààdi mucipite. Aci nkààdi mucipite muye kule.

Ndi ngamba anu nenku ewu: “Mwaneetu wa bakaji Howard, udi mwena kwitabuuja anyi?”

“Eyowa, ndi mwena kwitabuuja.”

138 “Eyo, Mwaneetu wa bakaji Howard, pawikalà mwena kwitabuuja, udi mupyanyi wa byònsò bidì Nzambi naabi.” Nenku mmukwata anu ku cyanza cyanààna. Nwamonu’s, ndi mémè ngiitabuuja cyôci aci. Ndi ndenga Mwaneetu wa bakaji Howard pa kumutentekela byanza. Yesu kàakambakù ne “nubasambidile” to, Yèyè wàkamba ne: “Nubatentekela anu byanza cyanààna.” Ki cyôci aci, pashiishe yèyè wòndopiibwa. Yèyè ùdi mwa kwamba ne: “Byònsò nebyakane,” Mwaneetu wa bakaji Howard. Nenku wèwè udi mwa kwalukila kumbelu ne kuumvwa bìmpè. Nzambi akubeneshe.

139 Wèwè udi Mwaneetu wa bakaji. . . [Mwaneetu wa bakaji awu ùdi wàmba ne: “Hampton.”—Muf.] Mwaneetu wa bakaji Hampton, wèwè’s udi mwena kwitabuuja, kî mmwòmò anyi? [“Eyowa.”] Udi mupyanyi wa byònsò bidìYe mufile. Nzambi ìkalè neebe, Mwaneetu wa bakaji Hampton. Alùkìlaku kwebe kumbelu ne ùmvwè bìmpè mpindyewu. Yesu Kilisto neàkwondòpe.

140 Wèwè udi Mwaneetu wa bakaji. . . [Mwaneetu wa balume kampana ùdi wàmba ne: “Slaughter.”—Muf.] Slaughter. Awu’s. . . Wèwè’s ngutùvwà baye kasambidila ku lupitaadi awu. Nanku, udi mwena kwitabuuja, Mwaneetu wa bakaji Slaughter, mupyanyi wa byònsò bitùdi tulomba ebi. Mwaneetu wa bakaji Slaughter, swaku wàngatè cyùdi mulombe aci, ne ùmvwè bìmpè. Nzambi neakupeesheci.

141 Mwaneetu wa balume Gene, udi witabuuja ne Nzambi neakupeeshe anyi? [Mwaneetu Gene ùdi wàmba ne: “Eyowa’s, mukalenge. Eyowa’s, mukalenge.”—Muf.] Nanku Mukalenge Nzambi asweku akupeeshe, Gene, anu menemene cyùdi wèwè ulomba aci! . . . ? . . .

142 Ndi mukumanye. [Mwaneetu wa bakaji awu ùdi wàkula—Muf.] Udi mwena kwitabuuja, mwaneetu wa bakaji. Ndi mukumanye. Ewu mbàyeebè mwaba awu. Yèyè ngùmvwà musambidile ku telefone dituku adi. Ntu misangu yònsò anu mvuluka bwalu abu. Kàvwa ne mushindu wa kuyaye ku disangisha dya ku Tulsa to. Kulwaye ku disangisha adi.

Nenku Mukalenge kumwondopaYe, kumutumaYe ku disangisha adi. Mpa kaaba kàà muntu mukwabo paùdì mwimane. [“Mwânà wa balume wa mwaneetu.”] Cintu cya bwena Kilisto kaayi, mwaneetu wa bakaji! Wamonu anyi? Yèyè ùwwa pèndè mwimanyine mukwabo, Yèyè wàkakiimana pa kaaba keetu twètù bônso. Wèwè udi mwena kwitabuuja ne udi ne bukenji ku byônso bìdì Nzambi mulaye. Mèmè ndi musadidi Wendè. Ne ku Dìnà dya Yesu Kilisto, ndi nkupeesha cyùdì ulomba aci.

¹⁴³ Lwâku, Mwaneetu Neil. Nzambi akubeneshe. Ûkaadi mukwenzèle bilenga byabûngì be. Udi mwena kwitabuuja. Aci kaayi ndi mumanye. Ndi mwitabuuje ne Nzambi neakupeeshe byônso byùdì ulomba abi, bwalu udi mwena kwitabuuja. Ne mèmè bu musadidi Wendè, kùdì wèwè, mwaneetu wa balume, mu Dìnà dya Yesu Kilisto, ndi nkupeesha dijinga dya mwoyi wèbè. Ndààku ùcipetè. Nzambi akubeneshe.

¹⁴⁴ Mwaneetu wa bakaji Bruce, ndi mukumanye. Munganga mukaji mutekete uvwa mumvinge nyima awu’s ùwwa mukumanye. Yèyè ngwa kuntu kwàka pabwìpì ne Motel JJ, Twin J, anyi cintu kampanda cya mushindu awu. Nutu baswe kwimana pa kaaba kàà bakwabo. Kadi dijinga dyebe dya kùdì Tatwèbè diloolo edi didi cinyi? [Mwaneetu wa bakaji Bruce ùdì wàmba ne: “Bwànyì mèmè mwine, diloolo edi.”—Muf.] Bwebe wèwè mwine, diloolo edi. [Mwaneetu wa bakaji Bruce ùdì wàkula cyakabidi.] Nanku, mwena lukuna mmukukùpe kule kùdì kùpita bangangabuka mutu, kadi mèmè ndi nkulonda, mwikàle ne ndundu wa nyuunyi. Ne mu Dìnà dya Yesu Kilisto, ndi ndudikila mukete wa ndundu wa nyuunyi awu mu kaalusoka kàdì kabwelè mu twonyi mu mushindu wà kakakàlámèmù aku. Necikwaluje kùdì Nzambi, ku nzubu Wendè.

Nyewu twàKulòmbu, mu Dìnà dya Yesu Kilisto. Amen.

¹⁴⁵ Wèwè udi tatwéndè wa muntu mulume ewu anyi, mukalenge? Udi mwena kwitabuuja anyi? [Mwaneetu wa balume awu ùdì wàkula—Muf.] Kààmunda mu luseke lwebe; kwinshi, ne mu luseke lwebe lwà dyabakaji. Udi witabuuja ne Nzambi neakupeesheci anyi, mukalenge, ne bu musadidi Wendè?

¹⁴⁶ Mukalenge, cyanza eci cikaadi pàmwàpa cyenzènze mudimu mukole matuku àbûngì. Mmulwe kaaba aka mu kiipacila kampanda, cintu kampanda cya dyenza. Cifilàku, dijinga dya mwoyi wèndè, Taatù, pàndì ndomba mu Dìnà dya Yesu bwa ne Wèwè neùcyènzè apa. Amen.

¹⁴⁷ Kwediku mpatà to. Kààmunda aku nekalekele kukusaama lwà kwinshi kwa difu aku, ne wèwè neùmwè bîmpè. Nzambi akubeneshe. . . ? . . .

¹⁴⁸ [Mwaneetu wa bakaji kampanda ùdì wàmba ne: “Cìdi cìnsaamisha mutu ne muminu’s. Cìdi cìnsaamisha mbadi pàndì nkòlola. Ncyèna mwa kwimbaku to. Ncyènàku mene mwa kwenza cintu nansha cimwe to. Ndi. . . ? . . . Kabidi ncyènàku

mwa kulaala bikole to. Ncyênàku mene mwa kwenza cintu nansha cimwe to.”—Muf.] Wèwè’s udi mwena kwitabuuja, kî mmwômò anyi? [“Mmwômò. Ndi muujiibwe tente ne Nyuma Mwîmpè.”] Udi mwena kwitabuuja. [“Ndi mumanye ne Nzambi mmusòmbèle munda emu.”] Kabidi udi—udi mupyanyi wa mabeneshà ònsò aa. [“Ndi mumanye. Ne ndi mwitabuuje. Ndi ngiitabuuja masambila ebe, Mwaneetu Branham. Ndi ngiitabuuja ne Nzambi neangondope. Ndi ngiitabuuja ne Yèyè ùdi wàndamuna masambila ebe.”] Twasakidila.

149 Taatù, nyewu ndwa ne yèyè ewu, mwaneetu wa bakaji ewu, mu mulongo wa mudilu, munkaci mwa cintu ciludikila. Ne ndi mmwaluja Kùdì, mmutuula ku nzadi ya mwena lukuna, mu Dîná dya Yesu Kilisto. Amen.

150 Anu nanku ki mwìkalàbi.

151 [Mwaneetu wa bakaji kampanda ùdi wàmba ne: “. . . ? . . . Ndi ne cisulusulu cìwà munkaci mwa kufwa, ne cimwe cikaadi cifwè.”—Muf.] Dikupanda dya cisulusulu.

152 Éyì Mukalenge, pàdì nsongààkàjì ewu mwimane kaaba aka apa, mucìkàle mu nsòkà ya bunsongà, nyewu mmusambidila. Ne cisulusulu cìwà cikèngela bwa kucyumushabo, ne yèyè mufwànyine kushààla wènda mukobame, matuku èndè ònsò a mwoyi. Wèwè’s ki wetù Taatù, nenku nyewu mmuludikila buludi kadilu kàà disambila, Mukalenge, anu buludi ku cyòcì cisulusulu aci. Ndi ntuma disambila edi mu Dîná dya Yesu Kilisto. Swaku bwa dîkatuutè ku cisulusulu aci ne dicyòndòpè. Mu Dîná dya Yesu Kilisto, mmùndì ndomba nunku emu. Amen.

153 Wèwè udi Mwaneetu wa bakaji . . . [Mwaneetu wa bakaji awu ùdi wàmba ne: “Mwaneenu wa bakaji Gibbs.”—Muf.] Mwaneetu wa bakaji Gibbs. [“Anu mu mutu menemene, ne mwômò amu ki mùdì munsaama.”] Menemene. Mutu wèbè mmuseemejiibwe kule naanyi. Wèwè udi mwena kwitabuuja ne mupyanyi wa mabeneshà ònsò a Nzambi, Mwaneetu wa bakaji Gibbs.

154 Mukalenge, nyewu ndwa nende Kùdì, mwikàle ne ndundu mukese wa nyuunyi ùdi Wèwè mumpeeshe ewu, mùvwà Wèwè mupeeshe Davìdì ndundu wa nyuunyi amu, bwa kwikalaye ùtàngila mikooko ya tatwèndè. Nenku bu mwena lukuna mwa kubwela bwa kukwata mukooko, yèyè kàvwa ùkwàcika bwòwà to. Ùvwa ùtwa cyanza pa ndundu mukese wa nyuunyi awu ne ùlumbatangana ne nyama ya ntambwe ne—ne ya ours ayi, ne ùvwa wàluja mukooko awu. Eci ndisambila dya diitabuuja. Wèwè utu mungambile ne bu mèmè mwa “kufikisha bantu ku diitabuuja ne mèmè kwikala ne meeji matooke.” Nyewu ngaaluja Mwaneetu wa bakaji Gert diloolo edi. Ndi mmubakula ku byanza bya mwena lukuna. Yèyè mmukooko Wèbè Wèwè. Ndi mmwaluja mu lupangu lwà Taatù, mu Dîná dya Yesu Kilisto. Amen.

155 [Mwaneetu wa bakaji kampanda ùdi wàmba ne: “Mwaneenu wa bakaji Lowe—Muf.] Mwaneetu wa bakaji Lowe. [“Ndi ne lwendu lwà mashi.”] Lwendu lwà mashi a àya lubilulubilu. Ne wèwè udi mwena kwitabuuja, kî mmwômò anyì, Mwaneenu wa bakaji Lowe? Mupyanyi wa dibenешa dyònsò.

156 Nanku, Taatù Nzambi, nyewu ndudikila disambila edi diloolo edi, byenze bu ne ndifumine ku ndundu wa nyuunyi wa Nzambi awu, bwa lwendu lwà mashi a àya lubilulubilu lwà Mwaneetu wa bakaji Lowe. Nenu swaku bwa musangu wàlondà wikalà ngangabuka mwa kuteeta lwendu lwà mashi alu, swaku bwa yèyè wàmutangila wàmba ne: “Ndukumbane mpindyewu.” Yèyè ewu neamanye ne cìdì cyenze nanku ncinyì. Mu Dìna dya Yesu Kilisto, ndi mmupeeshaci. Amen.

157 [Mwaneetu wa balume kampanda ùdi wàkula ne Mwaneetu Branham—Muf.] Eyowa’s. Mvw’a kujingaku ngíkala ne papa wanyì diloolo edi kaaba aka’s, mvwaku mufwanyine kwenza disambila bwèndè yèyè anu mpindyewu mene. Nèndyènzè bwa webè wèwè pèndè. Ndi muumvwe.

158 Taatù wa mu Dyulu, mulume udi mulelè mwànà wa balume ewu, yèyè udi pa buloba apa diloolo edi mbwèndè yèyè. Nenu mwanèndè wa munda mùdì nzala nyewu ùjinga bwa tatwèndè kwalujiibwaye mu dimupatula; mu buloba bwa mpekaatu mwàmwa, mukwaciki wa maala a kapyà. Èyì Mukalenge, ndi ntuma disambila edi ne diitabuuja ne dikanda, kabidi ne cyònsò cìndi mwa kudikùpa naaci aci, kaalusàkàlàbwà kakese aka, mu Dìna dya Mukalenge Yesu. Nyewu nkààsa démon udi mwele cintu cìdì cikàlàme kuntu kwàka aci awu. Nenu swaku bwa cyùmukè. Ne swaku bwa yèyè alwe ne dikubiibwa dyònsò ku lupangu lwà mikooko, mu Dìna dya Yesu. Amen.

159 [Mwaneetu wa balume kampanda ùdi wàmba ne: “Nsambidilèku, Mwaneetu Branham, bwa mpetè Nyuma Mwîmpè. Ndi muswe bwa mpetè Nyuma Mwîmpè. Bìkèngela anu mMupetè. Ndi ne dijinga adi. Bìkèngela bwa mpetè Nyuma Mwîmpè.”] Wèwè udi ne dijinga dya kuMupeta. Udi muswe kubwèla mu Buloba mùdì milayi yònsò yisanganyiibwa amu. [“Eyowa.”]

160 Nenu mpindyewu, Mukalenge, mwànà wa balume ewu nyewu ùsanganyiibwa anu dîshiyà dya musulu, mwase cituudilu luseke lukwabo, kadi Yadènè pèndè wènda wùla ne mu malèngè. Nenu kakùyì mushindu wa yèyè kusabuka paùdì Wèwè kuyì umupengela njila muWàkenzelà Yoshùwà ne Izaleela amu. Nenu, Taatù, nyewu nKulomba’s, mèmè bu musadidi Webè, itabaku bwa mwaneetu wa balume wa musinga mukole ewu, Èyì Nzambi wa yààyà, itabaku bwa àbwelè mu Buloba bulaya ebu, mulayi ewu. Bwa ne, ku luseke lukwabo lwàlwa, mushindu wùmvwà mwangaciibwe muye bufuku kampanda awu, swaku bwa ngàpetakù dyèsè dya kumuupukila ne kumwelaku maboko kunshingu, mu Buloba bukwbwa bwàbwa,

ngamba ne: “Mwaneetu wa mushinga mukole.” Enzaku nanku, Mukalenge. Swaku bwa àpetè mulayi wa Nzambi, Nyuma Mwîmpè awu. Amen.

¹⁶¹ Éyî Mukalenge, bwa ewu nunku, mwaneetu wa balume wa mushinga mukole ewu; cyanza cîtù cya musangeelu kûndî eci, ne cîkaadi cingenzenzele bintu eci, bûngî kabûyi kwamba. Yêyè ûdi witabuuja ne mwikàle ne diitabuuja. Kadi mwena lukuna nyewu ûkèba bwa kubakula yêyè ewu, mulunda wanyî ewu: nsukaadi. Ne ûdi wèla meeji ne ûdi mwa—ûdi mwa kubakula mwànà wa balume ewu. Kadi ndi mulwe bwa kumulonda. Ndi ndwa, bwa kwaluja Webè ewu, Mukalenge, mwikàle ndudikila lusoka elu ne diitabuuja dijaalamija bîmpè. Mu Dînà dya Yesu Kilisto ndi ngaasa disaamà dya nsukaadi adi! . . . ? . . . mwaneetu wa balume. Alùjàku mukooko Webè Wèwè mwine mu lupangu, Taatù, mu Dînà dya Yesu. Amen.

[Mwaneetu wa bakaji Bell ûdi wàkula ne Mwaneetu Branham—Muf.]

¹⁶² Éyî Mukalenge, mwaneetu wa bakaji mmumanye ne bujitu bwa bupitepite ebu, mùdî bangangabuka bàmba, ki cintu mene cîdî cîkushebeyà. “Kilô yònsò wa pamutu pàà bujitu bùdî bukùmbànyine, ûdi umusha cidimu cimwe ku mwoyi wa muntu,” bilondèshile kabala-matuku kàà assurance. Kadi pèndè mmuswe kwikalaku ne mwoyi bwa buneeme ne butumbi bwa Nzambi. Ne kakwena ngangabuka nansha umwe udiku mwa kwenza cyôci eci to, Taatù Nzambi. Cîdî anu mu—mu cyanza Cyèbè Wèwè. Ne Mwaneetu wa bakaji Bell ùtu wa lulamatu lwà dikema. Ne yêyè ùtu ne musangeelu ne wa ùtwàngana mushinga mu mateeta, àtùye ùpîcila awu. Mmupicile mu mateeta makole àbûngî. Nyewu ndwa bwa kumwangata diloolo edi, Mukalenge. Ndi ndwa bwa kutwilangana ne mulwishi awu kuntu kwàka. Ndi ngaasa ne ndudi yònsò yîndî pàànyî mwa kwasa naayi ayi. Mu Dînà dya Yesu Kilisto ndi nkùpa lusoka lwà diitabuuja alu ngaasa mwena lukuna udi mumukwate awu. Swaku bwa lwòlò lùmusùnsùlùlè, ne lùmunyeemèshè lubilu àmushiyè, nenku yêyè neapete mushindu wa kwalujuludiibwa ku mpàtà ya lutende lubishi lwà mu ditalàjà ne ku màyi matalale, mu Yesu Kilisto. Amen.

Necyènzekè, Mwaneetu wa bakaji Bell. Kwèdikù anu mpàtà to.

¹⁶³ Mwaneetu wa bakaji Spencer. [Mwaneetu wa bakaji Spencer ûdi wàmba ne: “Mwaneetu, Mwaneetu Bill, ndi ntamba kunanga Mukalenge ku dituku ne dituku dîndî ne mwoyi edi. Kabidi ndi ndwa apa kùkaadi bidimu kî mbîngî kî mbîngî makumi abidi, kaaba aka. Ne nkàadi mwondopiibwe ku cintu pamwe ne cyònsò cîkaadiku cintàcishe. Wèwè udi muvuluke byònsò abi, ne . . . ? . . .”—Muf.] Ndi muvuluke cya bushuwa, mwaneetu wa bakaji . . . ? . . . [“Kabidi Yêyè ùtu mumbeneshebeneshe bikole be! Ne mèmè ndi muMunange kupita, dituku dyònsò dya mwoyi

wànyì. Ndi mumanye ne ntu ne nsòmbelu mulenga wa dikema mu Mukalenge.”] Ndi ngiitabuuja aci, Mwaneetu wa bakaji Spencer. [“Ndi ne disanka. Ndi ne disanka! Cìndi mupete eci cyôci kaciyi Nyuma Mwîmpè to, ncìdi—ncidi mêmè anu nsanganyiibwa pa cyoshelu bwa byònsò bìdiYe naabi bwànyì mêmè. Ne mêmè nênmfwilè pa cyoshelu.”] Amen. [“Cyôci aci ki cìndi muswe bwa Yêyè kwenza ne ndi munkaci mwa kufwila pa cyoshelu ne Yesu.”] Amen. Nzambi akubeneshe...?... Amen. [“Ne nênkwambilè cìndi muswe bwa wêwè kwenza. Udi mumanye’s, Nowa wàkangata dîkù dyèndè dijimà e kubwelaye naadi pamwe nende, nenku ndi muswe dîkù dyànyì dijimà. Wêwè’s udi mumanye ne ndi muswe bwa bananga bàànyì kusungidiibwabo.”] Ndi muumvwe. Bàna beebe. Aci ncyà bushuwa. [“...?...bàna bàànyì.”] Eyowa’s, mwâbâna. [“Ne bàyaanyì.”] Eyowa’s, mukalenge, ndi... [“Bu mùdi mumanye byònsò pa bwalu abu.”] Eyowa. [“Uvwa mutùsambidile.”]

164 Twètù bònsò tudi bamanyè Mwaneetu wa bakaji Spencer, ne bamanyè mùvwàbo yêyè ne Mwaneetu wa balume Jess bashàale bàpìcila anu mu ntatu, kadi mùdibo bapicile bwa kufika mu ekeleeziya emu. Mêmè pângààsabukà kuya dyàmwàmwa, kabààkwikala bènda bàtetukatetuka mushindu ewu nansha. Nebiikalè bansongà. Kaa! Mwaneetu Jess, bu mêmè anu mwa...?...nudi bamanye’s. Ne pashiishe nwênù bònsò nudi bamanye mùdibi ne, anu—anu luseke lukwabo lwà kakese kàà...?...mwàmwa, wêwè udi walukila ulwa nsongààkàjì mulenga cyakabidi, ne Mwaneetu Jess ùlwa nsongààlùmè. Nzambi ngudi munulaye.

165 Mpindyewu, tangila. Ndi muswe bwa nkupeesheku anu ndambu mukese menemene wa dilongesha, bu mùdibi ne wêwè ki wa ndekeelu kaaba aka, ndi muswe kupeesha.

166 Bwalu, ndi mumanye ne ewu mmwaneebe mutekete wa balume, Charlie. Udi muswe bwa tumusambidilè anyi? [Mwaneetu Charlie ùdi wàmba ne: “Eyowa.”—Muf.]

167 Ndi muswe kwamba cintu cimwepele eci. Nukààdikù babalè mu Mifundu mwaba wùdi Bible mwambe cyôci eci anyi? Pòlò ngwákambila Kààmàndà kàà beena Loomo kàà masalaayi lukama.

Nudiku mwa kungumvwa bilenga anyi? [Disangisha didi dyàmba ne: “Amen.”—Muf.]

168 Wàkambila mwena Loomo awu, pààkapàtulàye mwele wèndè mu cimanga, bwa kudishebeyaye, ku Filipino aku pàvwàye ùsanganyiibwa mu buloko apu. Nenku dizakala dya buloba divwa dyupùle buloko abu. Kwambaye ne: “Itabuuja Mukalenge Yesu Kilisto, nenku wêwè ne bàà mu nzubu mwebe nenusungidiibwe.” Kacya nukààvwakù bumvwe aci anyi? “Wêwè ne bàà mu nzubu mwebe.” Mpindyewu, tàngilàayi. Wêwè ne diitabuuja bùngì bukùmbàne bwa lupandu lwebe wêwè

mwine, kwênàku kabidi mwa kwikala ne diitabuuja búngì bukumbàne bwa bàà mu nzubu mwebe anyi? Nzambi, mu mushindu kampanda, neàcyènzè.

169 Nenku, Mukalenge, ndi nsambidila Mwaneetu wa bakaji Spencer ne Mwaneetu wa balume Spencer, diloolo edi, bwa mwànà ne mwànà yònsò, bôbò ne bânà bààbò balela, kwikalabo mu Buloba bwa butumbi, bwa disanka abu mwikalà kamüyikù ní mmàsaamà ní mbukulakaji, ní ntuninganyinga ní ndyediibwa dya mâyi ku makàsà, ne mwoyi wònsò wà mukese wà pànu ewu newùjiminè bu cilòòtálòòtà cìdi cipite. Swaku bwa bàpetè cyòci eci, ne swaku bwa bânà bèndè bònsò, ne bàyèndè, bananga bèndè bònsò, ne bònsò bàdi bamunangè, ne bònsò bàdiye munangè, swaku bwa kwikalabo nende kwòkò aku, mu Dìnà dya Yesu. Amen.

170 [Mwaneetu wa bakaji Spencer ùdi wàmba ne: “Amen. Twasakidila.”—Muf.] Nzambi akubeneshe. [“Nénkumbajè bidimu makumi mwandamukulu ne bibidi, abidi aa.”] Bidimu makumi mwandamukulu ne bibidi. [“...?...Kadi bàdi bàlwa bakòòke, bukole abu. Kadi mèmè ncìcìtu anu ngenza midimu yànyi ya cikukù, ya disukula dya bilàmbà, ne ya dikoma, ne ya dikolopa dya mu nzubu.”] Anu mùdi buloba bwènda bunyanguka amu, Mwaneetu wa bakaji Spencer. [“Eyowa, mmùdìbi. Nkààdi ncyoka bikole, dìbà dyònsò. Bàdi bàcyùmvwà . . . Ngákakonka mààmù, mukaj’a tààtù, uvwa ne bidimu makumi citeema awu, mùdi muntu ùdyùmvwà pàdiye ùkùlakaja, kùkaadi ntanta mule. Yèyè kwamba ne: ‘Rose, pàmwàpa newikalè dìbà dyònsò anu mucyoke.’ Mèmè’s nkààdi mucyoke.”] Ee, cyùdi ukààdi anu pabwìpi ne kuya ku diikisha, udi umona’s. [“Ndi ncyoka be, dìbà dyònsò. Bìkaadi bìnkèngela diikisha. Ki cikaadi cìnkèngelà ncyòci aci.”] Eyowa’s, mwàbànà. [“Ne ndi muswe kwikishila mu Mukalenge, ku binù. Byònsò, byònsò bìndi naabi dijìnga.”] Eyowa. Lama wèwè anu diitabuuja dyebe mu Yèyè, Mwaneetu wa bakaji Spencer, nenku neusabuke ùye dyàmwàmwa. [“Mèmè ndi muswe kufwila pa cyoshelu, mu Dìnà dya Yesu. Yèyè kì ùndi muswe kumona, too ne piikalàYe ùkaadi ùbiikila anu kubiikila.”] Ne Yèyè wàkamba . . . [“Ndi muswe byònsò bìdiYe naabi bwànyi mèmè.”] Kabidi cya bushuwa anu mùndi mèmè mwimane neebe kaaba aka mushindu ewu, diloolo edi emu, Mwaneetu wa bakaji Spencer, ku ngàsà Wendè nènnumònè wèwè ne Jess dyàmwàmwa dya mukàlù dyàdya, bansongà ne mubidi tumatuma. Nènwikalè bònsò nwenda nuyeeema lubilu, nwela lubila ne: “Mwaneetu wanyi! Mwaneetu wanyi!” Nènnumònè.

Tujilujilu twèndè.

171 Taatù Nzambi, mwànà wa bakaji ewu ùvwa ne mutu munyunguluke, ne bwalu bwèndè mbupite bangangabuka mutu. Kùdi anu yèyè nkààyèndè, udi upangisha. Kadi ndi ndwa bwa bwalu bwèndè yèyè diloolo edi. Ndi ndwa Kùdi Wèwè, Taatù.

Ndi ndwa, ndomba bwa Wêwè kuludika disashì dîndî ne cya, dîngîikalà ne cya kutuuta. Swaku bwa cîikalè ciludikila anu menemene, ne ndudi yônso bwa dikosa mwena lukuna nyima. Swaku bwa disambila edi, mu Dîna dya Yesu Kilisto, dituutè dinyunguluka dya mutu adi ne didisûnsûlûlè, dyàlujè mukooko wà mu mpàta wa Nzambi ewu. Amen.

Cîdi anu ne cya kwenzeka, munanga wanyî.

172 [Mwaneetu wa bakaji kampanda ùdi wàmba ne: “Sambilaku anu cyanàànà. Ndi ne bânà basambombo bândî ndomba bwa Nzambi òndopè ne àsungile.”—Muf.]

173 Nzambi wa mu Dyulu, enzaku ne, bânà bèndè basambombo bàdiye ùjinga abu bàsungidiibwè. Yèyè mmuumvwe bujaadiki bwa Mwaneetu Daulton abu, bânà bèndè bàà bakaji balenga abu. Yèyè ùdi ùjinga bânà bèndè basambombo abu, Taatù. Swaku bwa àbàpetè. Swaku bàkatwilàngànè nende mu Buloba abu mùdî kamùyi bufuku, balamiibwe ne dikubiibwa dyònsò ne bakùbiibwe kùdî Mashi a Yesu Kilisto. Amen.

Swaku ùbàpetè, mwaneetu wa bakaji, ki disambila dyànyî.

[Mwaneetu wa bakaji kampanda ùdi wàkula ne Mwaneetu Branham—Muf.]

174 Ndi nkwitabuujà. Kakwena cintu, ku bintu pàmwè ne byònsò, cidiku mwa kucikwacisha to. Bàtù bàbàpeeshe kaacintu kampanda kakese kàà kafwànàngàne, kaa, ne cintu cyenzè bu acétamine. Mbwanga bwa dituuyisha naabu dikùyila, mùdibo babubiikila. Bwòbù, bùdi bùkushebeya, s'bùdi bwàmba kukushebeya. Bùdi bùkunyanga mashi mushindu awu. Kadi, tangila. Wamonu's, binyoka abi bìdî bu nyama wa ntambwe wàkabàkula mukooko e kunyeemaye kuya awu. Mpindyewu, ndundu wa nyuunyi neénzè cinyî? Kaa, ekelekele! Kùdî nyama wa ntambwe munene, ùkungula mwikàle ne mwànà wa mukooko. Ne yèyè munange mwànà wa mukooko awu, pa nanku yèyè kwasa lubilu ne mwànà wa mukooko awu. Kadi Davidi kwangataye ndundu wa nyuunyi ne kuyaye wènda ùlumbatangana nende. Wamonu anyi? Mpindyewu tângilàaku. Yèyè ùvwa ne nsoka yitaanu yidî diitabuujà: f-a-i-t-h, yèyè mwine, m-u. Ndundu wendè wa nyuunyi awu ùvwa mu *eci* cyanza: J-é-s-u-s. Yèyè mmwena ndudî wa kalàndààmùsèngà. Bikèngela bwa cintu kampanda cyènzèkè. Tuyaaku twenda tulumbatangana ne binyoka abi, diloolo edi, ku disambila edi. Nzambi asweku akupeesheci.

175 [Mwaneetu wa bakaji awu ùdi wàkula ne Mwaneetu Branham—Muf.] Mmuswe bwa kubatijiibwa mu Dîna? [“To. To. Kî ng'aci cyàmbiye to.”] Udi muswe bwa yèyè kubatijiibwa. [“Dijinga dyànyî ndya kumumona ùbàtijiibwa.”] Twasakidila, mwaneetu wa bakaji. Kabyena ne bwalu aci ki njila nansha. Mbwalu. . . Mpindyewu, bu ne civwa mu Bible, ne: “Taatù, Mwànà, ne Nyuma Mwîmpè,” s'mvwa—s'mvwa mufwànyine

kwitabuuja aci, s'mvwa mufwànyine kushààla anu naaci, mwaneetu wa bakaji. Ncivwakù—ncivwakù mufwànyine kupangakana to. Mvwa—mvwa mufwànyine kuswa cintu cimwecimwe aci. Ncivwaku mufwànyine kulekela... Mémè—mémè nèngàmbulè bujitu bwa cyôci aci, udi umona's. Nenku bìdi bìkèngela ncyàmbè mùdi *Cyôci* aci cyàmba; kabiyi bwa kupangakana to, kadi bwa kwikala ne meeji matooke.

176 Mpindyewu, Taatù, nyewu tulwa bwa bananga bèndè bàdi ne binyoka, kadi nyèyè ewu muswe bwa yèyè awu abatiijiibwe mu Dìna dya Mukalenge Yesu, bwalu aci ki cibweledi. Ki ciibi cyunzulula ncyôci aci. Ki mwaba wàkapengela Yoshùwà kajila kàvwà kàsabukà kàkabwela too ne mu buloba bulaya. Kakùvwa myaba yibidi anyi yisatu mipenga to; kùvwa anu wumwepele.

177 Peetèlò, mu Dituku dya Mpenta amu, pàakabanjijiibwà Ekeleeziya musangu wa kumpala, yèyè wàkapenga kajila, kwambaye ne: “Nyingalalaayi muntu ne muntu wa kunùdi ne nubatiijiibwe mu Dìna dya Yesu Kilisto.” Kacya bôbò kabaakaseesukaku mu kajila kamwekamwe aku to, muntu ne muntu wakasabuka e kubwela mu Buloba bulaya.

178 Bamwe bàà kùdìbo bàkaavwa bàteeta bwa kusabukila lwà kwinshi, ku cisabu cikwabo, kadi Pòlò kubàmbilayè ne: “Nutu babàtijiibwe mu dibatiiza kaayi? Kunùkaadi nukeba kusabukila aku ki kwèpi?”

Ki bôbò ne: “Lwà kwinshi eku's kùvwà Yone mutangile.”

179 Yèyè kwamba ne: “Ee, Yone yèyè ùvwa mufunkune anu dîbà cyanààna, ne mwaba.” Dîbà adi mbenze anu bumvwa aci anyi, pààbò bumba bàbàtijiibwa pa cisabu cìvwà cikèngediibwà. Ki bôbò kusabuka, ne kupetabo mwonji wà mvinyo wà Nyuma Mwimpè.

180 Enzelaku mwaneetu wa bakaji ne bananga bèndè nanku, mu Dìna dya Yesu Kilisto. Amen.

181 Mwaneetu Lyle. [Mwaneetu Lyle ùdi wàmba ne: “Mémè ndi ngiitabuuja ne wèwè ki sheefù wa cya bushuwa ne udi ukèngediibwa, Mwaneetu Branham.”—Muf.] Kaa, mwaneetu wa balume! [“Ndi musemene...?... Udi muvuluke ne bu ne bìvwa mmu ciloota aci, s'kwàkalwa cintu kampanda...?... Wèwè muteele cya mu ciloota aci, aci ncyà bushuwa. Ncyôci aci cìmvwà mumone. Pààbi's, wèwè utu ulòòta anu mu byôbi!...?...”] Eyowa's. Kùkaadi cikondo. [“Eyowa.”] Eyowa. Ndi ne disanka...?... Nzambi àkubènèshè. Wèwè udi mu njila mutangile ku Buloba bulaya mpindyewu! Pàmwàpa nènteelè cyôci aci.

182 Mbanganyi bàdiku bavùlùke anu pabwìpi ne mudimu wa bwambi ewu kushindikibwawù kùndi, ne mémè munkaci mwa kuloba ne muntu kampanda dîngà dituku, ku musulu, anyi dijiba kampanda? Nenku mvwa munkaci mwa kukwàta tuumishipa tukese, nenku Nyuma Mwimpè kulwaYe pambidi

pàànyì. Kùvwa . . . Muntu awu n’Ntemu wa Yehowah, ki civwàye. Mwanaabo wa balume ùdi kaaba aka mu mwaba kampanda, Banks Wood. Ùdi mwaba kampanda munda emu, ne yèyè ùtu mwena mutumba naanyì.

¹⁸³ Ewu n’Lyle. Ne bôbò bantu aba bàvwa Bantemu bàà Yehowah. Ki kwambabo, dîngà dituku ditùvwa munkaci mwa kuloba kuntwaku, paanyima pàà yèyè nsongààlùmè ewu mumane kukudimuna mucima, mèmè kumwambila ne kùvwa cintu kampanda mu nsòmbelu wendè, ne bìvwa—bìvwa byenzèke, ne byònsò pa bwalu abu. Cyôci ciine, yèyè ùdi ùfuma ku dingambila mpindyewu, ne wacyùmùshì anu mpindyewu mu nsòmbelu wendè, ncyà bushuwa, cyònsò civwàku aci. Ncyà bushuwa anu cya menemene. Tatwëndè nguvwa mu—mubadi. Papa ùdi kaaba aka diloolo edi anyì, Billy? [Muntu kampanda ùdi wàmba ne: “Katwena bamanye.”—Muf.] Nenku ne yèyè ne mukajèndè, bônso babidi, kubatijjibwabo, bwa kufila bujaadiki mu Dîna dya Yesu Kilisto, mu ciina cya mâyi emu. Kadi muntu ewu ùvwa musòmbè ku luseke lwànyì, dîngà dituku.

¹⁸⁴ Banks, udi penyi? Ùdipù kaaba aka diloolo edi anyì? [Muntu kampanda ùdi wàmba ne: “Anu lwà mu ditumba paanyima pàapa.”—Muf.] Paanyima mu ditumba’s. Eyowa.

¹⁸⁵ Nenku tuvwa munkaci mwa kuloba. Nenku, mwaneetu, mwanàànyì wa balume mutekete ùvwa mushebeye. . .mwva mèmè ndyambidila ne ùvwa mushebeye kampuusu kànà, ndambu wa matuku kumpala. Kaamaamù kampuusu aku kàvwa kalelè musùmbà wà tumpuusu twànà, kadi yèyè kukàmbula e kukàmacisha panshi. Mèmè kudyambidila. . . Mèmè kwamba ne: “Mukalenge neabiishe ku lufu kaamwoyi kakese,” dituku kumpala. Ncyà bushuwa anyì, Lyle? [Mwaneetu Lyle Wood ùdi wàmba ne: “Eyowa.”—Muf.] Musòmbèle mu cijengu kampana cya mâyi. Ki mèmè kwamba ne: “Ng’EMU MMUDÌ MUKALENGÈ WÀMBA.” Ki twètù kuloba bufuku bujimà katùyi bakwate kantu nansha kamwe to.

¹⁸⁶ Pààkacyàbu mu dinda, tuvwa munkaci mwa kuloba, mu kaacijengu kakese kàà mâyi, tulòba bikelè. Twòtò ntuumishipa tukese. Kadi Mwaneetu Lyle ùvwa ne mucì wà ndòbo munene, ki kulekelaye kakelè kakese kàmina ndòbo, ndòbo munene uvwaye nende awu, mu mushindu wà ne, pààkamupàtulàye mu mâyi, kanshinga kakese aku kàvwa kapweke kònsò munda, ndòbo munene awu, mu kafù kàà kaacikelè kakese aku. Nenku pààkamupàtulàye, kukèngelabi anu bwa yèyè kupatula twàmunda ne bikwabo byònsò bya kaacikelè aku, bwa kwangata ndòbo. Nenku kubipatulaye anu byònsò, bwalu ndòbo munene awu ùvwa mukakàlame mu kafù kàà kaamushipa amu. Nenku pààkenzàye nanku, ki kukiimanshaye panshi mu mâyi amu. Ki kuzakalalaku anu cyanàànà, misangu yinaayi anyì yitaanu, pààkù kùmba kùjika’s, bwalu twàmunda twàkù ne bya mu dibòdi bìvwa bikàpàtùkile ku mishiku ne bilembèlèlè. Ki

kushààlakù kalèlème mwaba awu ntanta wa wìpacila ku tusunsa makumi asatu nanku awu, kàlèlema too e kuyaku kabwela mu bisoosa.

187 Kadi mêmè mvwa musòmbe mwaba awu, munkaci mwa kuloba. Kadi dyakamwe nunku, Nyuma Mwîmpè kulwa, e kwamba ne: “Akula ne kaamushipa kàka.”

188 Mêmè kwamba ne: “Kaawêwè kaamushipa kakese aka, Yesu Kilisto ùdi ùkupèèshulula mwoyi wèbè.” Ki kaamushipa kakese aku, kiikàle kafwe pa màyi apu, kukudimukaku luseke lukwabo, ne kudyelaku nzwîng, kubwelaku mu màyi, kàya lubilu ne mwàkù mwònsò.

189 Mwaneetu Lyle ne Mwaneetu Wood bàvwa basòmbe mwaba awu. Mwaneetu Lyle kwambaye ne: “Mwaneetu Branham, aci’s ncyenzèke bwànyi mêmè’s, bwalu mêmè ngwambidi kaamushipa kakese aku. . .”

190 Diloolo edi, ndi mwa kubambila cyûvwà mwambe aci anyi? [Mwaneetu Lyle Wood ùdi wàmba ne: “Ncya bushuwa ne udi anu mwa kubambila. Bidi anu bìmpè, Mwaneetu Branham.”—Muf.]

191 Ùvwa mwambe, pààkakàpàtulàye twàmunda atu apu, yèyè wàkakiimansha kwàka, kwambaye ne: “Bwebe mbutùuke, kaamushipa wa yààya,” anu mushindu ewu. Kukiiimanshayè anu kwàka.

Kwambaye ne: “Aci’s—aci’s cìvwa bwànyi mêmè.”

Ki mêmè kwamba ne: “To, Mwaneetu Lyle. Kacìvwa aci to.”

192 Mwaneetu Banks udi paanyima pààpa wàwa, kwambaye ne: “Mbantu búngì kaayi pa buloba ebu, mbinunu búngì kaayi, bàdi bafwànyine kunanga kwikala biimàne mwaba wutùdi twètù biimàne ewu mpindyewu mene, bwa kumona bukole bwa Nzambi bùpweka bwènza cintu cya mushindu awu!” Mu ngaakwilù mukwabo, yèyè bu. . .

193 Ngeela meeji ne twàkadyùmvwa bònsò mwàkadyùmvwa Peetèlò amu ne: “Mbîmpè bwa kwikala mwaba ewu. Twìbakàayi ntenta yisatu.” Nwamonu anyi? Ncya bushuwa.

194 Mpindyewu, Mwaneetu Lyle, udi mulaabiibwe ne Nyuma Mwîmpè mpindyewu. Wàmanyi kuumuka mu Ejiipitu. Ngeesu ya matungulu a ayi ne bukooya bwa pa buloba bikaadi bishiya paanyima. Ukàadi mwimane ku mwelelu wà Yadènè patùdi twakulangana apa, anu menemene dîshiyà. Nzambi asweku àye neebe dyàmwàmwa; Lyle.

195 Nzambi wa Bukole bwònsò, civulukilu Cyebe’s ncyôci eci. Ncya bushuwa ne yèyè ùvwa ùsanganyiibwa mu mushindu mubi, Mukalenge, kadi mwoyi wànyi wàkadyùmvwa mukokiibwe kùdiye. Masambila etu mmafume ku dituuta dikofi mene dya njiwu mwàmwa, ne cintu mene cìvwa cìmupangishà aci cyàmuumukù. Cyàvingütùdiibù. Ne mpindyewu nyèyè ewu ùkaadi wènda ùya mutangile ku Yadènè. Ndàaku nende too ne

ku Buloba bulaya, Mukalenge. Ne mutwèku citampi munkaci mwa cisàmbà. Bwa ne, mu Dituku dya butumbi ditwàtwilanganà mwàmwa adi, ngâfikakù ku dyumvwa dinguupukila dya maboko èndè, mwikàle wèla lubila lukole ne: “Mwaneetu wa mushinga mukole!” “Ndi muMumanye.” Twàlakù Banks pamwe nende, Mukalenge, Udikù mwa kwangisha anyi? Papa ne maman, ne bôbò bônso, mwanaabo wa bakaji, ne famiye munene yônso awu, swaku bwa twatwilangana bônso mwàmwa, Mukalenge, ne muntu ne muntu wa kùdibo ikalè muujiibwe tente ne Nyuma Mwîmpè. Ndi ndomba mu Dîna dya Yesu. Amen.

NeuMupete, mwaneetu. Nzambi akubeneshe, Mwaneetu Lytle.

¹⁹⁶ [Muntu kampanda ùdi wàmba ne: “Mwaneetu?”—Muf.] Yè, mwaneetu. [“Kùdi dibiikila dya ntanta mule, ne lufu kampanda, dindile ku nshinga.”]

¹⁹⁷ Kùdi muntu ùpunga ne lufu, ku dibiikila dya ntanta mule. Nenku nêmpingajè bulombodi bwa disangisha kùdi Mwaneetu Neville pancidi mwàmwa apa.

¹⁹⁸ [Mwaneetu Neville ùdi wàmba ne: “Dituku dinene ne dilenga mu Mukalenge! Nzambi wàtwènzèdi bintu bilenga leelu ewu. Dindila dyànyì ndyùle anu patapata—Muf.]

[“Bônso cyapamwe, tùjuukilàayikù kuulu.]

¹⁹⁹ [“Nenku, nwavùlukaayi disangisha mu diisâtù diloolo. Nwàsambilaayikù bikole. Myoyi yìdi kayiyi misankishiibwe ne kayiyi mitwishiibwe ayi, yìpetanganè menemene ne Nzambi. ‘Dîbà dikaadi pabwîpi. Mpindyewu ki dîbà diine. Mpindyewu ki dituku dya lupandu.’]

²⁰⁰ [“Nzambi abenesheku umwe ne umwe wa kunùdi nwênù beenyi, nwênù bàdi bafùmine mu ntanta mile abu. Disambila dyetu dîdi ne Nzambi ànùpèèshèku luse lwà mu lwendu, panùdi nwalukila ku mbanza yenu apu. Mbilenga be bwa diikalaku dyetu neenu. Nenku nwatusambidilaayiku panuyaaya apu, bwa Mukalenge wàbèneshakù mwaba ewu kabidi.]

²⁰¹ [“Taatu wetù wa mu Dyulu, pàdi musadidi Webè mulwe diloolo edi apa, bwa kwenza mudimu wa musadidi Webè muprofeta, udi mwimane pankaci awu, mu mbwelelu, mwikàle wèla lupangu, ùlwa kutùdi mwikàle ne dijinga dikole dya dilàkuka kapyà dya musadidi Webè, bu mùdi dya mubatiijibwe ne Nyuma Mwîmpè, ne dya mupeeshiibwe mudimu wa muprofeta, bwa kwakula ne lukòngo elu. Tùkwàcishèku leelu ne diloolo edi, bwa kwakidila Mukenji wùdi wùlwa kutùdi, Mukalenge, dikankamika, bwa kwikala badìlongòlòle.]

²⁰² [“Beneshaku umwe ne umwe udi upàtuka mu biibi bya citanda eci diloolo edi awu. Swaku bwa bubeedi bùdi pambidi peetu, butùdi katùyikù bamanyè ne bùdi bishi abu, swaku bwa ngàsà Webè mubeneshiibwe awu ne bukole bitùkùbè ne bitùlamè ne bitwòndòpè, ne bitùlamè, too ne dîbà diWàdìlongolòlà bwa

kutotentemuna kuya neetu ku luseke lukwabo alu. Beneshaku aba bônso bàdi batekèshùbwe mu maboko ne beediibwe màyi ku makàsà, bàdi ne bwôwà, ne aba bàdi ne butekete.]

²⁰³ [“Nzambi, tudi tulomba diloolo edi bwa ditumwenekela dya pabwàdi, dibeneshiibwa dya kùdi Nyuma Mwîmpè, bwa kwikaladi diikishile pa mutàmbakanyi yônso awu, mwena lwendu, mwenyi yônso udi mutwëndèle awu. Yônso udi upàtuka mu ciibi emu diloolo edi awu, swaku bwa cibwikilu cya Mashi, cya ku nkuruse wa ku Kalvariyo aci, cimubwikilè ne cimulongòlòlè mu mushindu mukumbane.]

²⁰⁴ [“Ikàlàku utwòndopa patùdi tusaama. Tùlamèku ku cyanza Cyebe cya bukole. Tùlaabèku maanyi bwa mudimu. Enzaku bwa twètù kwikala twenda mu dinanga, kumpala Kwebe, matuku etu ônsò a mwoyi. Nenu twètù netuKutumbishe bwa ciine aci, bwalu tudi tulomba nunku mu Dîna dya Yesu Kilisto ne bwa bwalu Bwèndè. Amen.]

²⁰⁵ [“Nenu Nzambi anubeneshe. Ne tudi ne disanka dya kwikalaku neenu kaaba aka. Labulanganaayi ku cyanza muntu ne mukwèndè.”—Muf.]

²⁰⁶ Ndi nnwanyisha cya bushuwa bwa byônso binùdi bangezèle, karta ne...?..Eyowa’s, mukalenge. Mémè ndi nnwanyisha cya bushuwa...?..

²⁰⁷ Pa nanku tudi batume lusoka lwà diitabuuja...?..Nya’ kùvwa muntu wa ku...?..Pa nanku ngàtumu disambila bwa kumulonda, mu Dîna dya Yesu Kilisto. Úvwa mulàale mwaba awu munda mwa dîbà dijimà, kakùyì dituuta dya mashi, kakùyì mweyelu, kakùyì cintu nansha cimwe to. Kakùyì mweyelu, kakùyì dituuta dya mashi, anyi dyeyela, kakùyì cintu nansha cimwe to; mèsù ku mutu mapàtùke mu nyama, mudishinde mu cyambilu. [Mwaneetu Neville ùdi wàmba ne: “Mukaji ùmushiya anu mwaba awu too ne mwàfikì disambila adi.”—Muf.]

²⁰⁸ *Eci* cìcìdi anu cikàngula anyi? [Mwaneetu Neville ùdi wàmba ne: “Eyowa, cìcìdi anu cikàngula.”—Muf.]

²⁰⁹ Ndiku mwa kupeta ntema yenu anyi? Lwà kumutu eku, mutangadiki mukwabo wa citende, muiishi, mu Indiana emu, mwikàle munkaci mwa kuyiisha, mmudishinde mu cyambilu mufwe cikàdi, kwènji ntanta bu wa dîbà dijimà nanku. Pàvwàye ùyiisha apu, kudishindaye mpala mutwa panshi, ne kufwilaye mu cyambilu amu, mutangadiki mumanya bîmpè, munkaci mwa kuyiisha mu Indiana emu. Mpaasata mmulwe anu cyanànà ne mumbiikile. Mmufwe anu munkaci mwa kuyiisha’s mu dilaabiibwa dya Nyuma Mwîmpè, mudishinde mpala mutwa panshi, mèsù mapàtùke mu nyama, mweyelu mumwimane. Mbambe bashìndike ne mmufwe, mushààle kacya wàlààla mufwe munda mwa ntanta wa dîbà dijimà. Ki cintu kampanda kubambilaci bwa kubiikila ekeleeziya ku telefone bwa kungambilabo bwa mémè kusambila. Ki mémè

kutuma disambila bwa kumwaluja, mu Dîna dya Mukalenge Yesu. Swayiku nudisange naanyi ku diitabuuja, bwa kadiikadi dyâlwa kupanga kwasa cintu ciludikila aci; bwa kumupeeshaku cyakabidi luuya ne kumwaluja. Twasakidilaayi.

²¹⁰ Nzambi ìkalèku neenu, too ne pàngàànùmònà mu diisâtù diloolo. Nwênù bàà ku Géorgie ne mu nyungulukilu abu, nwâyaayi bilenga. Nzambi ìkalèku neenu.

²¹¹ Mwaneetu Pat . . . ? . . .



DITÈÈKIIBWA / LUA60-0515E

(Adoption ¹)

DILONDANGANA DYÀ MALONGESHA PA DITÈÈKIIBWA

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu diloolo, mu matuku 15 a ngondo mwitânù, cidimu cya 1960, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org